

# Roma marcačhu irmäñucunaman San Pablo cartacushan

Tantiyacunanchipaj:

Pablo cay cartata isquirbiran. Payga Asia quinran Tarso marcačhu yuriran. Roma runa caran. Maman-taytanpitam ichanga Israel casta caran. Israel runa cashpan auquilluncunapita sumaj yačhacuran. Yačhachicujninpis caran Gamaliel. Fariseu runa cayman čhayarpis, Tayta Diosninchipa shiminta sumaj-sumaj čharcuya munaran. Chaypitam Jesúzman yupachicujcunata chiquiparan. Llaquipashpan Jesúz ricariparcuptinmi ichanga, tantiyacururan Jesúz Tayta Diosninchipa Wawan cashanta. Chaypita-pacha cačhan cashpan Jesúspa alli willapanta chay-tucuyčhu willapäcuran. Chaypämi Tayta Diosninchí acracururan.

Pablupita musyayta munar, liguinqui: Hechos 8.1–3; 9.1–39; 11.25–26; 13.1–28.31.

Cay cartata isquirbiran Roma marcačhu jutuaj irmäñucunaman.

Pablo isquirbiran:

Llapan runa juchačhu cawashanpita: *Romanos 1.1–3.20.*

Jesucristuman yupachicuptinchi, Tayta Diosninchí juchanchita jungashanpita, alli ñawinwan ricamashanchipita, imaycamannis maquinčhu cawachimashanchipita: *Romanos 3.21–8.39.*

Unaypita-pacha      Israel      runacunata  
 acracushampita,      jipata      llapan      runa  
 maquinchhu cawananpita: *Romanos 9.1–11.36.*

Jesúspa shimin shungunchiman ́hayashanpita,  
 shungun munashannuy cawananchipita,  
 wiyacunanchipita: *Romanos 12.1–15.13.*

Roma marcaman Pablo aywananpita,  
 irmänucunata wamayänanpita: *Romanos 15.14–16.27.*

### *Pablo wamayashan*

<sup>1</sup> Roma marca irmänucuna, nuwa Pablo cartacallämü. Washäcuj Jesúspa mandurajnin caycä. Paypita willapäcunäpaj Tayta Diosninchu acracamasha. Caéhacamasha: «Alli willapäta willacur purimuy» nir. <sup>2</sup> Unaypita-pacha Washäcujninchu Jesús shamunanta Tayta Diosninchu musyachicuran. Alli willapanta musyachicur, shiminchüpis unay willacujcuna llapanta isquirbiran: <sup>3</sup> «Tayta Diosninchu caéhamushan Wawan cay pachačhu yuringapaj. Unay mandajninchu Davidpa willcan canga» nir.\* <sup>4</sup> Chaymi Wawan cashanta musyachicur, Espíritu Santuwan Tayta Diosninchu wañupita Jesústa cawarachimuran. Jinarcur munayniyuj cayman ́churaran. Cananga maquinchhu Taytanchi Jesucristu puriyächimanchi. Payga Washämajninchim. <sup>5</sup> Llaquipämär, nuwatapis ́churamasha shiminta willapäcunäpaj. Llapan runa shiminta ́chasquicunanta munar, maquinchhu

---

\* <sup>1:3</sup> «Tayta Diosninchipa shimin» ninanta castillänučhu ricsin:  
 «Santa Escrituras» nir.

cawananta munar, caćhacamasha: «Jäpa runacunatapis nuwaman yupachicamänanpaj shimiüta willapäcunqui. Paycunapis čhasquicunman» nir.\* <sup>6</sup> Roma irmänucuna, jamcunatapis Tayta Diosninchí acracushcashunqui Washäcu Jesúspa maquinčhu cawanayquipaj. <sup>7</sup> Chaymi cartacamü. Tayta Diosninchí llaquipäshunqui. Paymi acracushcashunqui. Wamrachacushcashunqui maquinčhu cawanayquipaj.

Tayta Diosninchipis, Tayta Jesucristupis alli ñawinwan ricayculläshunqui. Allilla cawaycachilläshunqui.

*Roma marcaman watucuj aywayta Pablo yarpashan*

<sup>8</sup> Irmänucuna, Washäcu Jesúzman yupachicur maquinčhu alli cawashayquita may-chaychüpis rimaptin, jatunpa cushicü. Chaymi llapaniquipita Tayta Diosninchita alliman čhurä. <sup>9</sup> Waran-waran jamcunapaj mañacapushätapis quiquin Tayta Diosninchí musyaraycan. Caćhacamashannuylla Wawan Jesúspa alli willapanta llapan shungüwan willapäcuycä. <sup>10</sup> Pay camacächiptin, watucuj shamushaj. Unaypita-pacha sumaj mañacuycä. <sup>11</sup> Jamcunawan tincuya sumaj munaycä. Tincur, Espíritu Santu tantiyachimashannuylla anyapäshayqui Tayta Diosninchiman sumaj yupachicunayquipaj. <sup>12</sup> Chaymi shimin shungunchiman sumaj čhayanapaj jucninchijucninchipis shacyächinacushun.

---

\* **1:5** Israel runacuna pitapis: «jäpa runa» nij mana Israel casta captin. Castillänučhu nin: «Gentiles.»

**13** Irmänucuna, achca cuti watucuj shamuya munaptisi, chapa mana pishimashachu. Marcanmarcan purishä-jina marcayquiçhpis sumaj willapäcunä. Marca-masiquicunapis Tayta Jesúspa shiminta ́chasquicunanta munaycä. **14** Tayta Diosninchi camacächiptin, llapan runata Jesúspa shiminta willapäman. Willapäshaj Roma marca-masiqui captinsi, jäpa runa captinsi, yaéhaj runa captinsi, pampa runa captinsi. **15** Chaymi alli willapata willapänäpaj marcayquicamanpis juclla ́chayamüman.

*Tayta Diosninchi jishpichinanpita willapashan*

**16-17** Washäcuj Jesúspa shiminta ́chasquicuptinchi, Tayta Diosninchi jishpichimanchi. Imaycamanpis maquinchu cawachimanchi Israel runa captinchisi, jäpa runa captinchisi. Chaymi mana pingacullar llapanpa ñaupanchu pii-maytapis willapäman: «Jesúspa shimin alli willapa» nir. Llapanchi juchata aparicush captinchisi Jesúspa shiminta ́chasquicuptinchi, alli ñawinwan Tayta Diosninchi ricamanchi. Shiminçhpis isquirbiraycan: «Pipis nuwallaman yupachicamaptin, alli ñawiwan ricas-haj. Imaycamanpis cawachishaj» nir.\*

*Tayta Diosninchipa ricay ñawinchu llapan runa juchayuj*

**18** Waquin runacuna Tayta Diosninchipa shimita wiyacuya munan. Chaypis juchallaçhu arujunawan mana manchapacujcuna wiyacunanta miçhan. Miçhar, janaj pachaçhu tiyaj Tayta Diosninchita ullgüchin. Ullgüchiptin, llapan runapa

---

\* **1:16-17** Habacuq 2.4.

juchanta jurgapanga. **19-20** Llapan runa musyan Tayta Diosninchi pī cashantapis. Quiquinmi musyachimashcanchi. Payga cay pachatapis, janaj pachatapis camaran. Chaypis quiquinta mana ricanchichu. Camashancunata ricarmi ichanga, imaycamanpis munayniuj cashantapis, shungun alli cashantapis tantiyacunchi. Chaymi pipis chapacuya mana camäpacungachu: «Tayta Diosninchi, ¿piraj cacullanpis?» nir.

**21** Juchallačhu arujcuna Tayta Diosninchi pī cashantapis musyan. Ichanga mana manchapacunchu. Camashancunata ricaycarsi, alliman mana čhuranchu. Shungunpis chucru. Umanpis mana yarpačhacunchu. Tayta Diosninchipa shungun munashantapis tantiyayta mana munanchu. **22** «Yarpay-sapa cā» nirsi, upa runa. Pishi-yarpayyuj. **23** Tayta Diosninchi munayniuj caycaptinsi, imay-imaycaman cawacuj caycaptinsi, juchačhu arujcuna mana manchapacunchu. Manchäga jircacunata manchapacun. Ushyacajlla captinsi, runacuna ricchacujmanpis, uywacuna ricchacujmanpis, pichuysacuna ricchacujmanpis, curucuna ricchacujmanpis manchapacun.

**24** Upa cayninwan juchallačhu aruyta munaptin, Tayta Diosninchipis mana mičharanchu. Paycuna shungun munapashannuylla juchallicur, marcapingay cawan. **25** Marca-pingay cawar Tayta Diosninchita jungaycur, ushyacajcunallaman yupachicun. Ñawin ricashancunallata manchapacun. Camacuj Tayta Diosninchitam ichanga mana manchapacunchu. Rasunpa payllam imay-imaypis alliman čhurash canman.

Chaynuy caycullächun. <sup>26</sup> Chaymi juchallačhu arushanpita Tayta Diosninchi cačharycuptin, acaripacur shungun munapashallančhu arun. Warmicunapis runanta mana munar, pingaypaj warmi-masillanwan cacun. <sup>27</sup> Chajjina runacunapis warmita mana munar, ullgu-masillanwan cacun. Pingaypaj ullgu-puralla sumaj munapänacun. Chaymi jucha aparicushanman-tupu Tayta Diosninchi ñacaycächin.

<sup>28</sup> Chaura mana manchapacuj caycar pampa-man čhuraptin, Tayta Diosninchipis cačharycuran shungun munapashanta ruracunapaj. Chaynuypa paycuna chucru shungun car, marcapingay cawan. <sup>29</sup> Juyu car, llutancunallapaj yarpan. Runa-masincunata chapata ruran. Imancunatapis munapan. Imamanpis čhayachiyta munan. Yargaj. Wañuchicuj. Chiquipäcuj. Achäquita ashij. Washa rimaj. <sup>30</sup> Tumpacuj. Tayta Diosninchitapis chiquipan. Runa-masinta ashllin. Pampaman čhuranacun. Jatuntucun. Mana ricsish juchacunata rurananpäpis yarpačacun. Maman-taytantapis mana wiycunchu. <sup>31</sup> Upa caynинwan imatapis tantiyacuya mana munanchu. Aunishantapis mana čharcunchu. Runa-masincunata chiquipan. Mana llaquipäcunchu. <sup>32</sup> Chaynuy juchačhu arushanpita Tayta Diosninchi wañuyman čhayachinanta musyaycarsi, mana wanacunchu. Manchäga runa-masincunapis juchačhu aruptin, sumaj cushicun. Shacyächin.

## 2

*Israel runacunapa juchantapis Tayta  
Diosninchi jurgapänanpita willapashan*

<sup>1</sup> Chaynuy cawaptinpis, runa-masiquipa juchanta ama jurgapanquichu. Jucta jurgapar, quiquipipis juchallačhu aruycanqui. Chaymi chapacuya mana junquipächu. <sup>2-3</sup> Tayta Diosninchim ichanga juctapis mana pacallar, llapan runapa juchanta jurgapanga. Jucha aparicushanman-tupu ñacaymanpis jaycunga. Chaymi: «Alli ñawinwan Tayta Diosninchi ricamashpan jishpichimanga» nirpis runa-masiquita pampaman čhurarga, chapacuya mana junquipächu. Paycuna-jina juchačhu cawashayquipita Tayta Diosninchi sumaj ñacachishunquipaj.

<sup>4</sup> ¿Alli cayninčhu caycaptinchu, llaquipäcuj caycaptinchu, tantiyacuj caycaptinchu, Tayta Diosninchita wasguiycanqui? Payga wanacärinayquita munar, llaquipäshunqui maquinčhu cawanayquipaj. <sup>5</sup> Jamcunam ichanga chucru shungu canqui. Juchačhu aruypita wanacuytapis mana munanquichu. Mana wanacuptiqui, ñacayman čhayänquipaj. Tayta Diosninchitapis ullguycacchinqui. Chaymi llapan runapa juchanta jurgapänan junaj čhayamuptin, mana chapäshunquipächu. Manchäga juchayquita jurgapar, sumaj ñacachishunquipaj.

<sup>6</sup> Llapanchitapis imanuy cawar rurashanchiman-tupu maymanpis čhayachimäshunpaj. <sup>7</sup> Allillačhu arujcunata imaycamanpis cawachinga. Paycuna Tayta

Diosninchí alli ricananta munar, maquillančhu cawayta munar, shungun munashallanta imatapis ruraran. <sup>8</sup> Juyu juchačhu arujcunatac ichanga jatun-tucushanpita, shiminta wasguishanpita Tayta Diosninchí imamanpis Čhayachinga. Sumaj ullgūchishanpita llaquipaypaj ñacachinga.

*Juchayuj cashanchita shungunchi musyacāchishan*

<sup>9</sup> Paycunata llap-llapanta juyu ñawinwan ricar, imamanpis Čhayachinga. Sumaj ñacachinga Israel runa captinsi, jäpa runa captinsi. <sup>10</sup> Tayta Diosninchipa shungun munashannuy cawajcunatac ichanga alli ñawinwan ricanga. Alliman Čhuranga. Allillačhu cawachinga Israel runa captinsi, jäpa runa captinsi. <sup>11</sup> Llapan runatam juc ñawillawan Tayta Diosninchí rican. Pitapis mana chapan-gapächu.

<sup>12</sup> Jäpa runacuna: «Moisés isquirbishanta imaypis mana wiyarüchu» nir chapacurpis, ñacaypita mana jishpingachu. Jucha apari-cushanpita Tayta Diosninchí jurgapanga. Israel runapis: «Moisés isquirbishanta musyä. Llap-llapanta wiyashcä» nir chapacurpis, ñacaypita mana jishpingachu. Jucha apari-cushanpita Tayta Diosninchí jurgapanga. <sup>13</sup> Payga rinrillanwan shiminta wiyajcunata ricaytapis mana munanchu. Llapan shungunwan wiyacujtam ichanga alli ñawinwan rican. <sup>14</sup> Waquin jäpa runacunapis Moisés isquirbishanta mana musyaycarsi, Tayta Diosninchipa shiminta wiyacun. <sup>15</sup> Manchapacur cawaptin, Tayta

Diosninchipa shimin shungunman ́hayashanta musyachimanchi. Allita rurash caycaptin, shungunpis: «Allim» ninga. Juchata rurash captinmi ichanga, shungullan jitarpunga. <sup>16</sup> Chaymi runacunapa shungun yarpashantapis Tayta Diosnillanchi musyacächinga. Camacächishan junaj ́hayamuptin, juchayuj, mana juchayuj cashanchitapis jurgapämänanchipaj Jesucristuta ́churanga. Paymi llapan runapa shungun yarpashanta musyapan. Chaynuy cananta willapaycaj.

*Israelrunacunata Tayta Diosninchijuchantaju-  
rgapashan*

<sup>17</sup> Waquinni qui chapacur ninqui: «Israel runa caycä. Moisés isquibishantapis llapanta musyä. Alli ricamar, marca-masintitä Tayta Diosninchí acracamasha jishpichimänanpaj. <sup>18</sup> Shungun munashantapis musyä. Shiminta ́charcur, allillata rurar cawaycä.» <sup>19</sup> Jatun-tucur, jäpa runacunatapis ninqui: «Japracunata-jina allipa pushaj Tayta Diosninchí pí cashantapis musyanayquipaj. Chacajchú-jina puriptiquisi, achquipäcu-jina Tayta Diosninchipa shungun munashanta tantiyachij» nir. <sup>20</sup> Yáchaj-tucur ninqui: «Jäpa runacuna pishi-yarpayyuj. Mallwajina mana imatapis tantiyanchu. Chaymi Tayta Diosninchipa shiminta llapallanta tantiyachü.» <sup>21</sup> Sumaj tantiyacunquiman. Jäpa runacunata: «Ama suwacuychu» nir tantiyachirpis, ¿imanirtaj suwacunqui? ¿Imanirtaj shimiquila mana ́charcunquichu? <sup>22</sup> «Majayquita ama jananpachinquichu» nir tantiyachirpis, ¿imanirtaj

quiquipicuna majayquita jananpachinqui?  
 «Jircacunata ama manchapacushunpishchu»  
 nirpis, ¿imanirtaj jarashancunata yatapanqui?  
**23** «Tayta Diosninchipa shimin sumaj alli» nirpis  
 shiminta mana ćharcur, quiquinta pingayman  
 ĉurarcaycanqui. **24** Chaypita jamcunapaj  
 shiminčhu isquirbiraycan: «Israel runacuna-janan  
 jäpa runacuna Tayta Diosninchita pingayman  
 ĉuraycan» nir.\*

**25** Israel runacunata Moiséspa shiminta  
 ćharcuptinchiraj, jirucush captinchiraj, Tayta  
 Diosninchchi alli ñawinwan ricamanchi: «Wamrämi  
 canqui» nir. Shiminta mana ćharcuptinchim  
 ichanga wasguimanchi: «Pi cashayquitapis  
 mana musyächu» nir. **26** Jäpa runacuna  
 mana jirucush captinsi Moiséspa shiminta  
 ćharcuptin, alli ñawinwan ricar Tayta Diosninchchi  
 wamrachacun. **27** Chaynuypa jäpa runacuna  
 mana jirucush caycarsi, Tayta Diosninchipa  
 shiminta ćharcushanpita ñauquishunquipaj:  
 «Israelecuna captiquisi, jurgapäshunayquipaj  
 achäqui caycan. Tayta Diosninchchi jamcunallata  
 shiminta musyachishcashunqui. Ichanga  
 mana ćharcunquichu. «Wamräpaj acracushcaj»  
 nir jirucachishcashuptiquisi, wasguipashcanqui.»  
**28** Chaymi shiminta janan-janallan ćharcuptiqui,  
 Israel runa captiquisi, jirucush captiquisi, Tayta  
 Diosninchchi mana wamrachacushunquipächu.  
**29** Payga shungun munashallanta ćharcuptinchiraj,  
 wamrachacamanchi. Shungunchi shungunwan  
 tincuptin, alli ñawinpa ricamanchi runacuna

---

\* **2:24** Isaías 52.5.

pampaman čhuramaptinchisi.

### 3

*Israel runacuna Tayta Diosninchipa ricay  
ñawinčhu alli cashan*

<sup>1</sup> Chaymi ama ninquichu: «Yuriynipita-pacha Israel runa captipis, ¿manačhi imananchu? ¿Imapäraj papäni jirucachimaran?» <sup>2</sup> Allipämi Israel runa yurishcanchi. Unay auquillunchicunallawan Tayta Diosninchichi parlanacuran: «Shimüta wiyacuptiqui, sumaj yanapäshayqui» nir.

<sup>3</sup> Chaura waquin Israel-masinchi Tayta Diosninchipa shiminta čhasquicuya mana munaptinsi, ¿Tayta Diosninchipis aunishanta jungaycungachuraj? <sup>4</sup> Mana imaysi jungangachu. Payga shiminta čharcun. Llapan runa tumpaptinsi, shiminta čharcur juchanchita jurgapämäshunpaj. Tayta Diosninchipaj rimar, shiminčüpis nin: «Mana llullacunquichu.

Runacunapa juchantapis jurgapanquipaj. Paycuna chapacuya munar tumpashuptiquisi, llullacushanta taripunquipaj» nir.\*

<sup>5</sup> Waquin Israel runa jucha aparicushanta tucuy-jinanpa chapacur nin: «Tayta Diosninchichi allita rurananpaj imatapis ruräman. Juchata aparicuptisi, aunishan-jina shiminta čharcun. Shiminta čharcunan alli. Chaymi shiminta čharcüshiycapti, wascamänan mana camacanmanchu, ¿au?» <sup>6</sup> Ichanga runa chapacuya mana camäpacungachu. Tayta Diosninchichi llapan runata iwal rican. Israel

---

\* <sup>3:4</sup> Salmo 51.4.

runacunapa juchantapis, jäpa runacunapa juchantapis llapanta jurgapanga. <sup>7</sup> Chaypis waquin runa chapacur ninmanchí: «Shiminta mana charcuptisi, Tayta Diosninchí juchäta mana jurgapämamanmanchu. Jurgapämaptinmi ichanga, waquin runacunapis Tayta Diosninchita manchapacunga: «Ima allish Tayta Diosninchí shiminta sumaj charcun» nir. Chaynuy Tayta Diosninchita manchapacuptin, allipächi jucha aparicushäpis, ¿au?» <sup>8</sup> Chaynuypis chapacun: «Rasunpa llutanta rurapti, Tayta Diosninchí llaquipämashpan alliman chayachimanga. Pablush chaynuy willapäcuycan» nir. Chaynuy tumpacujcunata quiquin Tayta Diosninchí llapan juchanta jurgapanga.

### *Llapan runa juchallicushan*

<sup>9</sup> Chaymi ama nishuwanchu: «Israel runacunalla Tayta Diosninchipa shungunman tincun.» Llapallanchi juchallicushcanchi. Israel runacunapis, jäpa runacunapis shungunchi munapashanta rurar, juchačhu cawaycanchi. <sup>10</sup> Tayta Diosninchipa shimin isquirbirashanéhu nin: «Tayta Diosninchipa ricay ñawinčhu llapan runa juchayuj.

<sup>11</sup> Llapan pishi-yarpayyuj.

Tayta Diosninchipága mana imasi jucunchu.

<sup>12</sup> Llapan runa Tayta Diosninchita wasguipasha. Pantacash purin.

Mayganpis allita mana ruranchu.\*

<sup>13</sup> Runa-masinta asyächicun.

Lullacullar cawan.

---

\* <sup>3:12</sup> Salmo 14.1–3; 53.1–3.

Wañuchicuj curu-yupay cawar, pitapis ashllir ushyan.\*

**14** Chiquicur, runa-masinta pampaman ñchuran.

Jagayächicuyllačhu arun.\*

**15** Pipis mana imanaycaptin, ñacayman ñhayachin.

Wañuchicuymanpis ñhayachin.

**16** Maypa purirpis, runa-masinta wañuchir ushyan.

Ushyapacaymanpis ñhayachin.

**17** Allilla cawananpaj mana imasi jucunchu.\*

**18** Tayta Diosninchichi pí cashantapis mana imasi jucunchu.

Imanillarpis, mana manchapacunchu.»\*

**19** Chaynuy Tayta Diosninchipa shimin Israel runacuna-janan isquirbiraycan. Paycunalla Tayta Diosninchipa shiminta ñhasquiran. Chaymi sumaj-sumaj wiyanman caran. Ñcharcuya mana camäpacurmi ichanga, Israelpunapis, jäpa runacunapis mana chapacushunpächu Tayta Diosninchichi jurgapämashanchi junaj: «Mana imačüpis juchallicushcächu» nir. **20** Tayta Diosninchipa shiminta pipis sumaj-sumaj mana ñcharcunchu. Llapallanta ñcharcuptinchiraj, Tayta Diosninchichi alli ñawinwan ricamanchi. Chaypis ñcharcuya mana camäpacunchichu. Chaymi juchayuj cashallanchita musyanchi.

### *Jesúsman yupachicushanpita willacushan*

**21-22** Canan alli ñawinwan Tayta Diosninchichi ricamänanchipaj mana Moiséspa shimintarächu

---

\* **3:13** Salmo 5.9; 140.3. \* **3:14** Salmo 10.7. \* **3:17** Isaías

59.7-8. \* **3:18** Salmo 36.1.

sumaj-sumaj ́charcunanchi. Unaypita-pacha Tayta Diosninchipa shiminwan Moiséspis, willacujcunapis piñapämashcanchi. Chaypis mana sumaj ́charcuya camäpacunchichu. Cananmi ichanga Jesucristuman yupachicushallanchipita Tayta Diosninchipi alli ñawinwan ricamanchi: «Juchaynaj canqui» nir. Chaymi ama chapacushuwanchu: «Israel runa caycä» nirpis: «Mana Israel runachu caycä» nirpis.

<sup>23</sup> Llapanchi juchata aparicushcanchi. Mana mayganchisi Tayta Diosninchipa shungun munashannuychu cawanchi. <sup>24</sup> Tayta Diosninchim ichanga llaquipäcu. Jishpichicu. Nuwanchi-raycur wañuyman Washäcu. Jesús ́chayashanpita alli ñawinwanna ricamanchi payman yupachicuptinchi. Jucha aparicushanchitapis mana yarparannachu. <sup>25</sup> Alli ricamänanchipaj Washäcu. Jesústa caćhamuran. Juchanchi jungacänan-raycur wañuyman ́chayachiran. Jesús juchaynaj car, quiquinpa caway-bidanta jararan Tayta Diosninchipa ullguyninta jasacächinanpaj. Chaymi payman yupachicuptinchi, alli ñawinwan Tayta Diosninchipi ricaycämanchi. Unay runacunatapis jucha aparicushanta mana jurgaparanchu. Manchäga paycunapäpis cawayninta Jesús jaranan captin, juchanta mana jurgaparanchu. <sup>26</sup> Paycunatapis llaquiparan. Chaynuypa unay runacunatapis, nuwanchitapis Jesúsman yupachicuptinchi, alli ñawinwan Tayta Diosninchipi ricamanchi.

<sup>27</sup> Chaymi alli ñawinpa ricamänanchipaj ama allitucushuwanchu: «Tayta Diosninchipa shimita llapallanta ́charcü. Shungun munashallanta

rurä» nir. Alli ricamänanchipaj Washäcuj Jesúsmanraj yupachicunanchi. <sup>28</sup> Imatapis čharcushanchipita ama alli-tucushuwanchu. Tayta Diosnillanchi nimäshuwan: «Juchaynaj canqui» nir. Jesúsman yupachicuptinchiraj, alli ñawinwan ricamanchi. <sup>29</sup> Israel-masicuna, chaymi ama yarpäshunchu: «Israel runacunalla Tayta Diosninchipa shungunman tincun» nir. Tayta Diosninchchi llapan runata llaquipan. Jäpa runacunapis shungunman tincun. <sup>30</sup> Tayta Diosninchchi jucnaylla. Washäcuj Jesúsman yupachicuptin, llapan runata alli ñawinwan rican Israel runa captinsi, jäpa runa captinsi. <sup>31</sup> Chaura yupachicullar Tayta Diosninchipa ricay ñawinčhu alli cawar, ¿Moiséspa shiminta pampaman čhurashuwanchu? Mana. Manchäga allipaj Moiséspa shimin caran. Chaymi pampamanpis ama čhurashuwanchu.

## 4

### *Abraham Tayta Diosninchiman yupachicushan*

<sup>1-2</sup> Cananga Abrahampita tantiyacushun. Israel runacuna alli-tucur riman: «Abrahamga marcanchipa unay taytan. Paytaga Tayta Diosninchchi alli ñawinwan ricaran» nir. Abraham alli cawaptin, marca-masincunapis alli ñawinwan ricaran. Tayta Diosninchim ichanga mana alli cawashanpitachu alli ñawinwan ricaran; manchäga yupachicushallanpita. <sup>3</sup> Shiminchüpis isquirbiraycan: «Yupachicushallanpita Abrahamta alli ñawinwan Tayta Diosninchchi ricaran» nir.\*

---

\* **4:3** Génesis 15.6.

**4** Canan mä, tantiyacushun. Arupacur ñchasquishanchi mana jarayninchichu; manchäga callpanchipa ñchaninmi. **5** Tayta Diosninchim ichanga alli ñawinwan ricamanchi mana imatapis arushanchipitachu, mana imatapis rurar cawashanchipitachu. Manchäga juchaáhu cawaycaptinchisi payllaman yupachicuptinchi, alli ñawinwan ricamanchi. **6** Unaypis chaynuy caran. Yupachicushallanpita Tayta Diosninchu runacunata alli ñawinwan ricaran; mana ima allitapis rurar cawashanpitachu. Shungunman tincuptin, cushish cawaran. Chaymi unay mandaj David cantaran:

**7** «Cushicärishun,  
Tayta Diosninchipa shungunman tincunchi.

Jucha aparicushanchita jungasha.

Llutan rurashanchita mana yarparannachu.

**8** Cushicärishun.

Alli ñawinwan Tayta Diosninchu ricamanchi.

Juchanchita mana imaysi jurgapämäshunnachu»  
nir.\*

**9** Chaynuy captin, yarpaáchacushun. Tayta Diosninchu, ¿pitataj alli ñawinwan rican? ¿Jírucush Israel runacunallatachuraj? Mana. Musyanchi Abrahama yupachicushallanpita Tayta Diosninchu alli ñawinwan ricashanta. **10** Alli ñawinwan ricananpaj, ¿Abraham jírucushachu? Mana. Jírucuya mana yaáhaycarsi, Tayta Diosninchiman yupachicuran. Jipataraj jírucusha. **11-12** Jírucunanpaj Tayta Diosninchu nirán: «Abraham, yupachicamar, jírucuy. Yupachicamashayquipita shungüman tincunqui.»

---

\* **4:8** Salmo 32.1-2.

Chaymi waquin auquillunchicuna mana yuriptillanräsi, auquillunchi Abrahamta alli ñawinwan ricaran. Payga Tayta Diosninchipa maquinchú cawanapanj, änir jírucusha. Chaynuypa Abraham Tayta Diosninchiman yupachicujcunapa taytan-yupay caycan. Chaymi mana jírucush jäpa runa captinchisi, jírucush Israel runa captinchisi, Abraham-jina yupachicuptinchi, alli ñawinpa Tayta Diosninchí ricamanchi.

*Tayta Diosninchí aunishanpita willacushan*

**13** Unayga Abrahamta aunir, Tayta Diosninchí niran: «Abraham, yupachicamashayquipita pii-maytapis alli ricashaj. Jam-raycur, willcayquicuna-raycur, pii-maytapis sumaj yanapäshaj.» Chaura mana Moiséspa shiminta charcushanpitachu auniran; manchäga yupachicushallanpita.

**14** Chaymi: «Moiséspa shiminta charcujcunalla Tayta Diosninchí aunishanta chasquinga» nimaptiqui, ¿imapäräj Tayta Diosninchiman yupachicunchi? ¿Imapäräj Tayta Diosninchipis auniran? **15** Jäpa runacuna Tayta Diosninchipa shiminta mana chasquiranchu. Chaymi wiycushanpitapis, mana wiycushanpitapis Tayta Diosninchí juchanta mana jurgapanmanchu. Waquin runacunam ichanga Tayta Diosninchipa shiminta chasquirsi, mana charcunchu. Chaymi mana wiycushanpita, Tayta Diosninchita ullgüchishanpita, unyanta cutichinan camacan.

**16** Payman yupachicuptinchim ichanga, aunishanta Tayta Diosninchí charcun. Llaquipämashpanchi alli ñawinpa ricamanchi.

Chaymi Moiséspa shiminta wiycacu Israel runa carsi, jäpa runa carsi, Abraham-jina yupachicushun. Yupachicujcunaga Abrahampa wawanwan tincun. <sup>17</sup> Aunishanta unayna Tayta Diosninchi musyachicuran. Shiminchüpis isquirbiraycan:

«Abraham, chay-chica marcapa taytan canayquipaj jamta acracushcaj» nir.\*

Tantiyayta mana atiparsi, Abraham sumaj yupachicuran. Tayta Diosninchi wañushcunata cawarachinantapis, mana ricashancunata camacächinantapis musyaran.

<sup>18</sup> Tantiyayta mana atiparsi, Tayta Diosninchi aunishanman Abraham sumaj yupachicuran. Payta aunish caran: «Abraham, willcayquicuna chay-chicaj cangapaj. Yupaytasi mana atipaypaj miranga. Chay-tucuychüpis marcayangapaj» nir.\* <sup>19</sup> Auninacushan wichan Abraham paćhac (100) wata-yupayta aywaycaran. Churiyäcunapaj alläpa chachana caran. Warmin Sarapa quilla jishyanpis ĉarcushana caran. Chaypis Tayta Diosninchi aunishanman Abraham yupachicuran. <sup>20</sup> Ishcay yarpayta mana yarparanchu. Manchäga sumaj yupachicuran. Tayta Diosninchitapis alliman ĉuraran: «Taytallau Tayta, ima allish wamrata tarichimanquipaj» nir. <sup>21</sup> Aunishanta Tayta Diosninchi camacächinantapis musyaran. <sup>22</sup> Chaynuy yupachicuptin, alli ñawinwan Tayta Diosninchi juchaynajta ricaran. <sup>23</sup> Mana Abrahamllatachu yupachicushanpita alli ñawinwan rican. Manchäga isquirbirashančhu

---

\* <sup>4:17</sup> Génesis 17.5. \* <sup>4:18</sup> Génesis 15.5.

nuwanchipäpis rimaycan. <sup>24</sup> Yupachicuptinchi, alli ñawinpa Tayta Diosninchi ricamanchi. Paymi Taytanchi Jesústa wañuypta cawarachimuran. <sup>25</sup> Juchanchi-janan jishpichimänanchi-raycur Jesúsa wañuyman ́chayananpäpis Tayta Diosninchi camacächiran. Jinarcur cawarachimuran: «Jucha aparicushayqui-janan Jesúsa caway-bidanta ́churaptin, shimiña ́chasquicujcunata alli ñawiña ricä» nir.

## 5

### *Alli ñawinpa Tayta Diosninchi ricamashanchi*

<sup>1</sup> Chaymi Taytanchi Jesucristuman yupachicuptinchi, alli ñawinwan Tayta Diosninchi ricamanchi. Jesucristu wañuynipa juchaynajta ricamashpanchi maquinchüpis allilla cawachimanchi. <sup>2</sup> Jesucristu camacächisha Tayta Diosninchipa shungunwan tincunanchipaj. Payga llaquipämashpanchi maquinchu purichimanchi. Janaj pachaman apacamänanchita musyarpis, cushish cawaycanchi. Ñaupallanchu cawashunpaj. <sup>3</sup> Runacuna ñacachimaptinchisi, cushish cawanchi. Ñacaywan Tayta Diosninchipa shungun munashannuy cawayta sumaj yačhacunchi. <sup>4</sup> Shungun munashannuy cawayta yačhacuptinchi, shungunwan tincunchi. Shungunwan tincuptinchi, ñaupanman apacamänanchita mana yamacaypa shuyaraycanchi. <sup>5</sup> Chaymi ñacayman ́chayaptinchisi, shungunchi mana llaquicunchu. Manchäga maquinchu Espíritu Santu purichimaptinchi, Tayta Diosninchi llaquipämashanchitapis sumaj tantiyacunchi.

**6** Llapanchi juchačhu cawaptinchisi, wañuypta jishpiyta mana camäpacuptinchisi, nuwanchiraycur Washäcuj Jesús wañuyman čhayananta Tayta Diosninchi camacächiran. **7** Alli runata, Tayta Diosninchipa shiminta čharcuj runata pipis wañuy-caway washanman. **8** Tayta Diosninchim ichanga sumaj llaquipämanchi. Wasguitptinchisi, juchačhu aruycaptinchisi, jishpichimänanchiraycur Washäcuj Jesús wañuyman čhayananta camacächiran. **9** Wañur, caway-bidanta čhurasha alli ñawinwan Tayta Diosninchiri camänanchipaj. Washämaptinchi, Tayta Diosninchipa ullguynin jasacäcusha. Ñacaymanpis mana čhayachimäshunpänachu. **10** Chiquiptinchisi, shungunwan shungunchi tincunanta munaran. Chaymi nuwanchi-raycur Wawan Jesús wañuyman čhayananpaj camacächiran. Cananmi ichanga cawarimusha. Cawarish caycar, sumaj yanapaycämanchi Tayta Diosninchipa maquillančhu cawananchipaj. Chaymi alli ricanacunchi. **11** Chaypitam shiminchita mana amucircunchichu. Manchäga alli ñawinwan Tayta Diosninchiri camashanchipita, washämänanchiraycur Tayta Jesucristuta cačhamushanpita sumaj cushicunchi.

### *Adánwan Jesucristuta tincuchishan*

**12** Sumaj tantiyacushun. Unayga Tayta Diosninchita mana wiယacur, Adán juchata aparicuran. Chaypita wañuran. Wañuran juchata aparicushanpita. Cananpis Adán-jina llapanchi juchata aparicushanchipita wañuyman čhayashunpaj. **13** Moisés mana willapäcuptillan,

unay runacunapis juchallačhu cawaran. Chaymi paycuna chapacuya mana camäpacuranchu: «Shimiquita mana musyashcächu» nir. Chaynuy chapacuptinsi, llapanpa juchanta Tayta Diosninchu jurgaparan. <sup>14</sup>Chaymi Adán cawashan wicanpita Moisés cawashan wichancaman llapan runa juchata aparicushanpita wañuran. Quiquin Adán juchata aparicushan-jina llapan runa wañuyman čhayan Tayta Diosninchipa shiminta mana musyarpis. Chaymi tincuchiypa tantiyachimanchi: Adán llapan runata wañuyman jančharan. Washäcuj Jesúsmi ichanga llapan runata alli cawayta tarichinanpaj camacächiran.

<sup>15</sup> Jesucristu Tayta Diosninchita wiycuran. Adánmi ichanga mana wiycuranchu. Adánpita llapanchi wañuyman čhayashunpaj juchata aparicushanchipita. Jesucristupitam ichanga sumaj llaquipämashpanchi alli ñawinwan Tayta Diosninchu ricamanchi. Tayta Diosninchipa maquinman čhayachimänanchi-raycur caway-bidanta Jesús čhuraran. <sup>16</sup> Tayta Diosninchu llapanchita jurgapämäshunpaj ima juchata aparicushanchitapis. Jurgapämäshun Adán juchata aparicushanpita. Paypa juchan llapanchita aypämashcanchi. Juchayuj caycar, ñacayman čhayananchi camacan. Chaypis llaquipämashpanchi alli ñawinwan Tayta Diosninchu ricamanchi: «Juchaynaj canqui» nir. <sup>17</sup> Adán mana wiycushanpita llapanchi wañuyman čhayananchi. Jesucristu washämaptingim ichanga, Tayta Diosninchawan allina ricanacunchi. Sumaj llaquipämashpanchi alli ñawinwan ricamanchi. Chaymi janaj pachačhu imaycamanpis

Jesucristuwan cawashunpaj.

<sup>18</sup> Chaymi Adánlla juchata aparicush captinsi, llapanchitana Tayta Diosninchi jurgapämäshunpaj: «Jucha-sapa canqui» nir. Jesústa wiyacuptinchim ichanga, alli ñawinpa ricamashpanchi imaycamanpis cawachimäshunpaj. <sup>19</sup> Adán mana wiyacushanpita llapanchi juchata aparicushcanchi. Jesústa wiyacushanchipitam ichanga alli ñawinwanna Tayta Diosninchi ricamanchi. <sup>20</sup> Unayga Moiséswan Tayta Diosninchi shiminta musyachicuran runacuna allíchu cawananpaj. Runacunam ichanga čharcuya mana camäpacur, juchačhu arushanta tantiyacuran. Juchata aparicuptinsi, Tayta Diosninchi mana yamacaranchu. Manchäga unay runacunatapis, nuwanchitapis sumaj llaquipaycämanchi. <sup>21</sup> Mayganinchipis juchata aparicushanchipita wañuyman čhayananchi caran. Llaquipämashpanchi Taytanchi Jesucristu washämaptinchim ichanga, alli ñawinwan Tayta Diosninchi ricamanchi. Janaj pachačhu imaycamanpis cawananchipaj shuntacamäshunpaj.

## 6

### *Ushyacushpanchi Jesucristuwan cawanchi*

<sup>1</sup> Chaura Tayta Diosninchi llaquipämashanchita willapaptij, llutanta yarparunquiman. Ama nimanquimanchu: «Juchata aparicushämantupu Tayta Diosninchi llaquipämartin, juchačhüchi sumaj arushaj.» <sup>2-4</sup> Juchata ama aparicushuwanchu. Jesús wañuyman

chayashanta musyanchi. Ayantapis pampaycuran. Tayta Diosninchim ichanga munayninwan cawarachimuran mushuj cawaychu cawanapaj. Nuwanchipis Washäcu Jesúzman yupachicunchi. Maquinchu cawar, ushyacunchi. Ushyacur, pampacuycaj-yupay ricacunchi. Aya imatapis mana munashan-jina nuwanchipis juchata ama munapäshuwannachu. Manchäga Jesúspa maquinchu cawaycar, mushuj cawaychüna cawashun. <sup>5</sup> Payga wañuyman chayar, cay pachachu cawaytapis jaguiycuran. Tayta Diosninchim ichanga mushuj cawayman cawarachimuran. Nuwanchipis Jesúzman yupachicur ushyacurmi, jucha rurayta jaguishcanchina. Chaymi Jesústa cawarachimushan-jina nuwanchitapis mushuj cawayman churamanchi. Jesúswanna cawanchi.

<sup>6</sup> Mä, tantiyacushun. Ñaupata juchachu aruya mana munaptinchisi, jucmi maquichacamashcanchi llutanta rurananchipaj. Cananmi ichanga Jesúzman yupachicushanchipita mana maquichacamanchichu. Jesúrus ruschu wañuyman chayashan-jina nuwanchipis wañushupay ricacushcanchi. Mana juchallaçhünachu cawaycanchi. <sup>7</sup> Pipis wañur, juchata mana aparicunnachu. Chay-jina nuwanchipis jucha rurayta jaguishcanchi. <sup>8</sup> Wañuyman chayashanchi-yupay caycaptinchisi Washäcu Jesúzman yupachicuptinchi, imaycamanpis Tayta Diosninchu cawachimäshun. Payga Jesústa cawarachimushan-jina nuwanchitapis mushuj cawayman chayachimashcanchi. <sup>9</sup> Cawarish

caycar, Washäcuј Jesúس yapay mana wañungachu. Wañuyman mana ćhayangachu. Tayta Diosninchí cawarachisha. <sup>10</sup> Juchapita washämänanchipaj juc cutilla wañuyman ćhayaran. Juchayuj caycaptinchisi, nuwanchi-raycur wañuyman ćhayaran. Cawarcamurpis, Tayta Diosninchipa shungun munashallanta rurar cawaycan. <sup>11</sup> Aya juchata mana aparicushan-jina nuwanchipis jucha aparicuyta jaguiycushcanchi. Mushuj cawaychüna Washäcuј Jesúس cawaycächimanchi. Chaymi Tayta Diosninchipa shungun munashallanta rurar cawaycanchi.

<sup>12</sup> Chaymi wañucujlla caycar, juchačhu ama arushunnachu. Llutan rurayta munaparsi, juchata ama aparicushunnachu. <sup>13</sup> Imačüpís ama juchallicushunnachu. Jesúس-jina nuwanchipis Tayta Diosninchipa maquinčhu cawashun. Shungun munashannuy cawar, allilata rurashun. Payga wañuypita cawarimushta-yupayna ricamanchi. Chaymi shungunwan tincushallanta rurar cawashun. <sup>14</sup> Tayta Diosninchí alli ñawinwan ricamanchi mana Moiséspa shiminta ćharcuptinchichu. Manchäga llaquipämashpanchi paypa maquinčhüna cawaycanchi. Yanapämaptinchi, shungun munashannuy cawashun. Jucha ruraytapis ama munapäshunnachu.

*Tayta Diosninchipa shungunman tincushanta rurananchipaj*

<sup>15</sup> Sumaj tantiyacushun. «Llaquipämashpanchi alli ñawinwan Tayta Diosninchí ricamanchi shiminta mana ćharcuptinchisi» nir willapaptij, llutanta

yarparunquiman. Ama jitapämanquichu: «Alli ñawinwan ricamashpanchi jishpichimaptinchiga, juchačhu arucushaj» nir. <sup>16</sup> Musyanchi uyway runa taytanpa shiminta wiycushanta. Nuwanchipis uyway-yupay caycanchi. Chaymi: «Tayta Diosninchipa maquinčhu cawä» nirga, shimintapis sumaj wiycushuwan. Shungun munashallanta rurashuwan. Chaynuy cawaptinchim, alli ñawinwan ricamanchi. Mana wiycuptinchim ichanga, supaypa maquinčhu cawar juchata aparicushanchipita wañuyman ĉhayashunpaj.

<sup>17</sup> Cananga supaypa maquinčhu mana cawanchichu. Manchäga Tayta Diosninchipa maquinčhüna cawaycanchi. Ima allish willapäcushäcuna shunguyquiiman ĉhayasha. Llapan shunguyquiwanna wiycuycanqui. <sup>18</sup> Jucha aparicuya jaguinayquipaj Tayta Diosninchipi jishpichishcashunqui. Cananga maquinčhu cawar, uywaynin-yupay shungun munashallanta ruranquiman. <sup>19</sup> Ushyacajlla caycanchi. Chaymi sumaj tantiyacunayquipaj uyway runawan tincuchiypa willapaycay. Tayta Diosninchipa maquinčhu mana cawar, llutan rurayllata, jucha aparicuyllata yarpashcanchi. Cananmi ichanga paypa maquinčhu cawar, allillata rurashun. Shungunman tincushallanta rurashun.

<sup>20</sup> Tayta Diosninchipa maquinčhu mana cawar-raj shungunchi munapashallanta rurar, juchata aparicushcanchi. Mana pipis piñapämäranchichu: «Tayta Diosninchipa shungun munashallanta ruray» nir. <sup>21</sup> Munapashallanchita rurar,

pingayllaman ́chayashcanchi. Pingayman ́Chayar, Tayta Diosninchwan imaysi mana tincushuwanchu caran. Manchäga wañuyman ́Chayashuwan caran. <sup>22</sup> Tayta Diosninchim ichanga maquińchu purichimanchi: «Jamta acracushcaj» nir. Shungunchitapis ticrachiran: «Jucha aparicuyta ama munapanquichu. Manchäga shungü munashallanta ruranqui» nir. Shiminta wiyacuptinchi, alli ñawinwan ricamashpanchi janaj pachaman shuntacamäshun imaycamanpis cawananchipaj. <sup>23</sup> Chaymi Taytanchi Jesucristuman yupachicur maquińchu cawaptinchi, Tayta Diosninchim imaycamanpis cawachimäshun. Juchallačhu arujcunam ichanga wañuyman ́chayanga.

## 7

*Moiséspa shiminpita willapäcushan*

<sup>1</sup> Irmänucuna, Moiséspa shiminta sumaj musyanchi, ¿au? Llapallantapis ́charcunanchi; wañurmi ichanga manana. Chaymi tincuchiypa tantiyacushun. <sup>2-3</sup> Majayuj warmi majanpa maquińchu cawan. Shimintapis wiyacun. Majayuj caycar jucwan cacurga, majanta jananpachin. Majan wañucuptinmi ichanga, japallanna ricacun. Jucwan majachacar, wañuj majanta mana jananpachinnachu.

<sup>4</sup> Irmänucuna, llapanchi juchata rurar purishcanchi. Nuwanchi-raycur Washäcuj Jesús wañushanman yupachicurmi ichanga, wañush-yupay ricacushcanchi. Jucha ruraypitapis jishpichimashcanchi. Chaymi alli ñawinwan

Tayta Diosninchí ricamänanchita munar, mana Moiséspa shimintarächu čharcunanchi. Manchäga Jesúspa maquinčhüna cawananchi. Paytana wiyacunanchi. Wañushanpita Tayta Diosninchí cawarachimusha. Paypa shungun munashannuyna cawashuwan. <sup>5</sup> Naupata supaypa maquinčhu cawar Moiséspa shiminta čharcuya munaptinchisi, supay imačhüpís jucha aparicuya munapächimaranchi. Juchačhu cawaycaptinchi, wañuyman čhayananchi caran. <sup>6</sup> Cananmi ichanga Tayta Diosninchipa maquinčhu cawananchipaj mana Moiséspa shimintarächu wiyacunanchi. Wañush-yupay caycar, Moiséspa shiminta wiyacunanchi mana camacannachu. Juchata rurar mana cawanchinachu. Manchäga Espíritu Santu yanapämaptinchi, Tayta Diosninchipa shungun munashallanta rurar cawaycanchi.

*Moiséspa shiminpita juchayuj cashanta tantiya-cushan*

<sup>7</sup> Chaynuy captinsi, ama yarpäshunchu: «Moiséwan Tayta Diosninchí isquirbirächishan shimin sasa. Čharcuya mana camäpacupti, wañuyman čhayachiman» nir. Paypa shimin alli. Jucha ima cashantapis tantiyachimanchi. Nuwanchi-raycur Tayta Diosninchimusyachicun: «Runa-masiquipa imancunatapis ama munapanquichu» nir.\* Chayraj imatapis munapar: «Juchata aparicushcanqui» nir jurgapämänanchita tantiyacunchi. <sup>8</sup> «Ama munapanquichu» nimaptinchisi, yargaj canchi. Runa-masinchipa

---

\* <sup>7:7</sup> Éxodo 20.17; Deuteronomio 5.21.

imancunatapis sumaj munapanchi. Ichanga Tayta Diosninchipa shimin mičämaptinchiraj, jucha cashanta tantiyacunchi. Shimin mana mičämaptinchim ichanga, ima juchatasi mana aparicushuwanpishchu.

**9** Ņaupata Moiséspa shiminta mana musyar, imasi mana jucushcächu. Shiminta musyarmi ichanga juchačhu cawashätapis, **10** Tayta Diosninchipa maquinčhu mana cawashätapis tantiyacushcä. Moiséspa shiminta čharcur imaycamanpis cawayta yarpashcä. Shimin juchačhu cawashäta musyachimaptinmi ichanga, imaypis wañuyman čhayänäta tantiyacushcä. **11** Chaypis llutanta yarpar nishcä: «Juchačhu cawarsi Moiséspa shiminta llapanta Čharcurga, imaycamanpis Tayta Diosninchipa maquinčhu cawashaj.» Chaynuy nirpis, Tayta Diosninchipa maquinpita witicushäpita wañuyman čhayachimänan caran. **12** Chaypis Moiséspa shimin alli. Payga Tayta Diosninchipa shiminta willacuran. Ima-imata rimashanpis sumaj alli. Wiyacushanpis alli.

**13** Chaynuy captin, ama yarpämanchu: «Moiséspa shimin alli captinsi wañuyman čhayar, Tayta Diosninchawan mana imaysi tincushächu» nir. Mana Tayta Diosninchipa shimin-jananchu wañuyman čhayashaj. Manchäga paypa shiminta čharcuya mana munarmi, wañuyman čhayashaj. Juchallačhu aruyta munaparmi, juchata aparicü. Juchallicur, juchallačhu cushish arushäta tantiyacü. Juchasapa cashäta Moiséspa shimin musyacächin.

**14** Musyanchi Moiséspa shimin Tayta

Diosninchipa shimin cashanta. Nuwam ichanga wañuj runa car, juchata aparicullar cawä. Mana wiyacur, shungü munapashallanta rurä. <sup>15</sup> Tantiyayta mana atipächu. Llutanta rurarpis, mana pingacüchu. Alli rurayta munarsi, chucru shungu cä. Llutancunata juclla rurä. Allita ruraytam ichanga sasächicü. <sup>16</sup> Chaynuy jucha ruray jančhamaptinsi, ičhipuya mana camäpacuptisi, Moiséspa shimin alli. <sup>17</sup> Charcuytapis munä. Chaypis mana camäpacüchu. Shungüga munapashallanta ashir, juchaman jančhaman. <sup>18</sup> Wañuj runa capti, juchallačhu purichiman. Allillata rurayta munarsi, mana camäpacüchu. <sup>19</sup> Alli rurayta munarsi, llutanta rurä. Jucha rurayta wasguiyta munarsi, juchata aparicü. <sup>20</sup> Jucha aparicuya mana munarsi, juchata aparicü. Ichanga mana quiquüpitachu aparicü; manchäga shungü jančhamaptin.

<sup>21</sup> Cananraj sumaj tantiyacü. Tayta Diosninchipa shimin nishallanta rurayta munaptisi, shungü jucha aparicuytaraj munapan. Alli rurashäpita chapäman. <sup>22</sup> Tayta Diosninchipa shungunman shungü tincunanta munä. Shimintapis wiyacuya munä. <sup>23</sup> Wiyacuya sumaj munaptisi, shungü juchata munapan. Munapashanta camacächiptin, jucha rurayman čhayä. <sup>24</sup> Wañuj runa carmi, sumaj llaquicü. Imamanpis čhayashaj. Juchallicush capti, ¿piraj wañuypita jishpichimanga? ¿Piraj Tayta Diosninchawan tincuchimanga? <sup>25</sup> Chaypis sumaj cushicü. Tayta Diosninchitapis alliman čhurä. Ima allish Taytanchi Jesucristuta cačhamusha

llapaninchita jishpichimänanchipaj.

Chaymi ama jungashunchu. Tayta  
Diosninchipa shiminta ćharcushuwan. Shiminta  
ćharcuya munarsi wañuj runa caycar, juchatapis  
aparicunchi.

## 8

### *Espíritu Santu charimashanchipita willacushan*

<sup>1</sup> Washäcuj Jesúspa maquinčhu cawaptinchi,  
mana juyu ñawinwanchu Tayta Diosninch  
ricamanchi. Ñacaymanpis mana jaycamanchichu:  
«Juchayyujmi canqui» nir. <sup>2</sup> Manchäga

Washäcuj Jesúspa maquinčhu cawaptinchi,  
Espíritu Santu cawachimanchi. Payga jucha  
munapaypita jishpichimanchi. Wañurpis, chacaj  
pachaman mana ćhayashunchu. Manchäga  
Tayta Diosninchipa ñaupanman ćhayashunpaj.

<sup>3</sup> Paymi nuwanchi-raycur llapanta camacächiran.  
Ñaupataga shungunchi munapashallanta rurar  
wañuj runa caycar, Moiséspa shiminta ćharcuya  
mana camäpacushcanchichu. Chaymi wañuyman  
ćhayananchi caran. Chaynuy captinchisi, Wawan  
Jesústa Tayta Diosninch caáchuran. Jesúsga

wañuj runa yuriran. Ichanga nuwanchi-jina runa  
caycarsi, juchata mana aparicuranchu. Chaypis  
nuwanchi-janan runacuna ñacachiran. Nuwanchi-  
raycur wañuymanpis ćhayachiran. Chaypitam  
juchaynajtana Tayta Diosninch ricaycämanchi.

<sup>4</sup> Cananraj paypa shiminta ćharcuycanchi. Ñaupata  
shungunchi munapashallanta rurar, juchallačhu  
arushcanchi. Cananmi ichanga Espíritu Santu

shacyächimaptinchi, Tayta Diosninchipa shungun munashannuylla cawaycanchi.

*Espíritu Santu pusharämashanchipita willapashan*

<sup>5</sup> Juchallačhu arujcuna shungun munapashallanta ashin. Tayta Diosninchipa shungun munashanta ashijcunam ichanga Espíritu Santuta wiyacur cawan. <sup>6</sup> Juchačhu arujcuna shungun munapashallanta ashir, wañuyman čhayan. Tayta Diosninchipa ñaupanman imaypis mana čhayangapächu. Espíritu Santuta wiyacurmi ichanga, allilla cawanchi. Tayta Diosninchipa ñaupančüpis cawashunpaj. <sup>7</sup> Juchačhu arujcuna shungun munashallanta ashir, Tayta Diosninchita ticrapun. Shiminta wiyacuya munarsi, čharcuya mana camäpacunchu. <sup>8</sup> Chaymi shungunchi munapashanta rurar, Tayta Diosninchipa shungun munashanta rurayta mana camäpacunchichu.

<sup>9</sup> Jamcunam ichanga shunguyqui munapashanta mana ruranquinachu. Manchäga Espíritu Santuta wiyacuycanqui. Washäcuj Jesús camacächiynipa shiminta čhasquicushayquipita Espíritu Santupa maquinčhu cawarcaycanqui. Mana čhasquicujcunatam ichanga maquinčhu mana charanchu. <sup>10</sup> Maquinčhu Washäcuj Jesús purichimaptinchi, Tayta Diosninchipis: «Juchaynaj caycanqui» nir alli ñawinwan ricamanchi. Chaymi juchata aparicushanchipita wañuyman čhayarsi, mana ushyacaj cawayčhüna Tayta Diosninchchi puriyächimanchi. <sup>11</sup> Sumaj tantiyacushun. Runacuna Washäcuj Jesústa wañuchiptinsi, Espíritu Santuwan Tayta

Diosninchí cawarachimusha. Wañushanpita Jesústa cawarachimushan-jina nuwanchitapis Espíritu Santuwan cawarachimäshunpaj. Paymi maquinchú charämanchi.

**12** Irmänucuna, sumaj tantiyacushun. Espíritu Santu charämaptinchi, Tayta Diosninchipa shungun munashanta rurashun. Quiquinchi munashanchinuylla ama cawashunchu.

**13** Shungunchi munashallanta ashiptinchi, wañuyllaman čhayashunpaj. Espíritu Santu yanapämaptinchim ichanga jucha aruypita witicur, imaycamanpis Tayta Diosninchipa ñaupančhu cawashunpaj.

**14** Espíritu Santu shacyächimashanchinuylla cawashpanchi Tayta Diosninchipa wawan caycanhi. **15** Chaymi mana manchacunchinachu. Mandu-rurajcuna jucpa maquinchú cawar imata mañacuriytapis manchacun. Nuwanchim ichanga Tayta Diosninchipa wawan cashpanchi imatapis mañacunchi: «Papäninchi» nir.

**16** Shungunchipis shungunwan tincuptin, Tayta Diosninchipa wawan cashanchita Espíritu Santu sumaj musyachimanchi. **17** Chaymi wawan captinchi, imaypis mana pishichimäshunchu. Washäcuj Jesústa ricashan-jina nuwanchitapis ricamäshunpaj. Runacuna Jesústa ñacachishan-jina nuwanchita ñacachimaptinchisi, achicyaj pachaman Tayta Diosninchí čhayachimäshunpaj. Jesústa-jina nuwanchitapis alli cayman čhuramäshunpaj.

*Tayta Diosninchipa ñaupančhu sumaj  
cushicuypita willapashan*

**18** Chaymi ñacayman chayarpis, ama imasi jucushunchu. Tayta Diosninchipa ñaupanman chayaptinchi, achic-achicyaycaj pachaáchu cawachimäshunpaj. Chay wichanga ima cushicuymaraj chayachimäshunpaj. **19-21** Chaypis ñaupanman shuntamänanchi junaj mana chayamunrächu. Tayta Diosninchichi camashancuna llapanpis uticash cashpan shuntamänanchitaraj shuyäcuycan. Camashancuna quiquillanpita alliman tircrayta mana junchu. Manchä ismucäcun. Wañucurin. Tayta Diosninchichi camacächiptin, manacajmanpis chayan. Shuntacamänanchi junajmi ichanga llap-llapanta jishpichinga. Camashancunata shungun munashanman cutichinga. Wamrancunatapis ricsichicur, alli cawayáchu cawachinga.

**22** Jishyaj warmi nanaywan japaraptin, jishyacuycashanta musyanchi. Chaynuymi Tayta Diosninchichi camashancunapis cananllaga alliman jishpichinanta munar, japaraycan. **23** Nuwanchipis ñacayáchu cawar, sumaj llaquicunchi. Janaj pachaman mana chayallarpis, Espíritu Santupa maquináhu cawaycanchi. Shuntamashpanchim ichanga Tayta Diosninchichi ricsichicamäshun: «Wawämi canqui» nir. Junciraj cawaychüna cawachimäshunpaj. Mana wañucujnachu imaycamanpis cawachimäshunpaj. Chaynuy cawananchita shuyarpaycanchi.

**24** Jucha aparicuypita Tayta Diosninchichi jishpichimashanchipita-pacha shuyarpaycanchi janaj pachaman shuntacamänanchita. Chaypis mana shuntacamashanchicaman Tayta Diosninchiman yupachicuycänanchi. **25** Janaj

pachaman ́chayash caycar, ¿shuntacamänanchita yupachicushungarächu? Mana. Chaymi ima ñacayman ́chayarsi, Tayta Diosninchiman yupachicur shuyarpaycanchi.

**26-27** Llutäpacuptinchisi, Espíritu Santu yanapämanchi. Llutäpacur mañacuya mana camäpacuptinchisi, tantiyamanchi. Quiquinmi Tayta Diosninchita mañacapamanchi. Llapan wawancunapa shungun munashanta tantiyachin. Tayta Diosninchipa shungun munashannuylla parlapämanchi.

*Llaquipämashpanchi Tayta Diosninch'i mana cacharimänanchipita willapashan*

**28** Ima ñacaych'u captinchisi, Tayta Diosninch'i yanapaycämanchi. Payta manchapacuptinchi, imatapis allipaj camacächin. Chaycuna tantiyachimanchi shungun munashannuy cawananchipaj. Chaypämi acracamashcanchi.

**29** Cay pachata mana camallarraj, llapan shiminta wiyacujcunatapis, nuwanchitapis Tayta Diosninch'i acracamashcanchi Wawan Jesúzman llucshinanchipaj. Jesúsga Tayta Diosninchipa jichpa wamran-yupay caycan, nuwanchina shullca wamran-yupay. **30** Chaymi shungun yarpashannuy camacächir, acracamashcanchi. Wamrachacamashcanchi. Alli ñawinwan ricamanchi. «Juchaynajmi canqui» nir achicachicyaycaj pachamanpis shuntacamäshunpaj.

**31** Sumaj tantiyacushun. Tayta Diosninch'i tucuy-jinanpa yanapaycämanchi. Chaymi runacuna ñacachimaptinchisi, chapata ruramaptinchisi, ama llaquicushunchu.

**32** Sumaj llaquipämashpanchi nuwanchiraycur quiquinpa Wawan Jesústapis wañuypita mana jishpichishachu. Manchäga jucha aparicushanchipita jishpichimänanchi-raycur wañuyman čhayachisha. Cawarcachimur, janaj pachamanpis shuntacusha. Cananga alli ñawinwan ricamashpanchi tucuy-jinanpa yanapaycämanchi. **33** Runacuna: «Jucha-sapa» nimaptinchisi, Tayta Diosninchi chapaycämanchi. Acracamashpanchi alli ñawinwan ricaycämanchi: «Juchaynaj carcaycanqui» nir. **34** Chaymi pipis mana jurgapämäshunnachu: «Juchačhu arushcanqui» nir. Jishpichimänanchi-raycur mayna Jesús wañuyman čhayasha. Cawarcachimur, mandäshinanpaj Tayta Diosninchi janaj pachaman shuntacusha. Diricha-caj lädunčhu jamachiran. Chayčhüna Washäcuj Jesús parlapaycämanchi.

**35** Washäcuj Jesús sumaj llaquipämanchi. Maquillančhu chararämanchi. Chaymi tucuyjinanpa ñacaptinchisi, yargaptinchisi, pishipacuptinchisi, llaquicuptinchisi, wañuchimaptinchisi, mana jungamanchichu. **36** Tayta Diosninchipa shiminčüpis nin:  
«Maquiquičhu cawashäpita jaticačhar ushyarcaycäman.

Uyshata pishtashan-jina wañuchimayta ashircayan.»\*

**37** Chaypis Washäcuj Jesús llaquipämaptinchimaman čhayarsi, alličhu llucshinchí. **38-39** Maquinpitapis Tayta Diosninchi mana cačharimäshunchu. Cay pachačhu cawaypis,

---

\* **8:36** Salmo 44.22.

wañuypis, janaj pachačhu munayniyujcunapis, pacha rurinčhu munayniyujcunapis, canan wíchan tincupacaycunapis, wara-warantinpaj yarpačacuycunapis mana wasguichimäshunchu. Mana imapis maquinpita jurgamäshunchu. Tayta Diosninchí mana cačharimäshunchu. Taytanchi Jesucristuta cačhamuyninpa sumaj llaquipämashanchita musyachimaranchi. Cananga paypa maquinchüna cawanchi.

## 9

### *Israel runacuna Tayta Diosninchiman mana yupačicushan*

<sup>1</sup> Irmänucuna, Israel-masicuna Washäcuj Jesúsman mana yupachicuptin, llaquish cawä. Mana llullacüchu. Washäcuj Jesúsman yupachicupti, Espíritu Santu yanapäman rasullanta rimanäpaj. <sup>2</sup> Sumaj-sumaj llaquicü. Waran-waran shungüpis nanan. <sup>3</sup> Israel-masicuna Washäcuj Jesúsman yupachicunan-raycur, imamanpis chayäman. Juyu ñawinpa Tayta Diosninchí ricamänan captinsi, mana llaquicümanchu. <sup>4</sup> Israel runacunaga Jacobpa willcallan caycanchi. Israel runacunallata Tayta Diosninchí wamrachacuran. Chunyaj pachačhu purishan wíchanpis achic-achicyaycar ricaripunyaran. Parlanacunyaran. Sinaí puntačhu shimintapis musyachiran. Quiquinmi wasinčhu imanuy-imanuy alliman churanañpäpis, jaranañpäpis tantiyachiran. Yawar-masillanpita Washäcuj yurinatapis auniran. <sup>5</sup> Unay auquillunchicuna caycan Abraham, Isaac, Jacob.

Paycunapa willcallanpita Washäcuj yurinantapis Tayta Diosninchi camacächiran. Yawar-masillan Jesús caycaptinsi, Israel-masicuna wasguiparan. Washäcujinchi Jesúsmi ichanga cay pachatapis, llapan imacunatapis maquinchu charan. Payga Tayta Diosninchim. Payllata imaypis alliman churashun. Chaynuy caycullächun.

**6-7** Israel-masicuna Washäcuja wasguipänanpaj, ¿Tayta Diosninchichuraj aunishanta cutiricuran? Mana. Tayta Diosninchi mana Abrahampa, Jacobpa llapan willcancunatachu wamrachacuran. Mana Israel runacunallatachu wamrachacuran. Manchäga shungun munashallanta wamrachacuran. Quiquin Abrahamtapis niran: «Isaacnillaryquita wamrachacushaj. Payllapita willcayquicuna miranga.»\* **8** Tayta Diosninchi mana Abrahampa llapan wamrancunatachu wamrachacuran. Manchäga aunishan-jina jucnayllata wamrachacuran. **9** Abrahamta aunir, Tayta Diosninchi niran: «Watan caynuy wican cutimupti, majayqui Sara wamrayujna caycanga. Llapanta camacächishaj.»\*

**10** Auquillunchi Isaacpapis warmin Rebecačhu ishcay wamran caran. **11-13** Ichanga wamrancuna mana yuriptillan, allita, mana allita rurananpis mana musyacaptillan, Tayta Diosninchi Rebecata niran: «Jichpa wamrayqui shullcanpa maquinchu cawanga.» Tayta Diosninchipa shiminčüpis isquirbiraycan: «Shullca captinsi Jacobta llaquipar, wamracha-cushcä.

---

\* **9:6-7** Génesis 21.12. \* **9:9** Génesis 18.10, 14.

Esaútam ichanga jichpa captinsi, wasguishcä.»\*  
 Tayta Diosninchi shungun munashallanta wamrachacun. Payga allita, mana allita rurashantapis mana ricanchu. Manchäga munashallanta camacächin.

*Tayta Diosninchi allillata rurashan*

<sup>14</sup> ¿Chaymi: «Tayta Diosninchi llutanta ruraycan» nishuwanchuraj? Mana. <sup>15</sup> Moiséstapis marca-masinpaj mañacapuptin, quiquin Tayta Diosninchi niran: «Manacaj captinsi munar, pitapis wamrachacushaj. Shungü munashancajllata llaquipäshaj.»\* <sup>16</sup> Tayta Diosninchi wamrachacamänanchipaj mana quiquinchihu callpachacunanchi. Manchäga llaquipashpan shungun munaptin, pitapis wamrachacun. <sup>17</sup> Shiminchüpis Egipto marca mandajta Tayta Diosninchi nin: «Faraón, munayniyuj canayquipaj camacächishcä. Chaymi nishä-nishäta rurachishayqui nuwalla munayniyuj cashäta llapan runa musyananpaj. Maychaychüpis nuwallata manchapacamanga.»\* <sup>18</sup> Tayta Diosninchi munar, pipa shunguntapis chucruyächin ullgujyänanpaj. Llaquipayta munar, pitapis llaquipan.

<sup>19</sup> Sumaj tantiyacushun. «Tayta Diosninchi shungun munashallanta camacächin» nipti waquinniqui llutanta yarpar, niramanquiman: «Juchata aparicuptinchisi, Tayta Diosninchi mana piñapämäshunchu. Paypa shungun munashanta mana ticrachishuwanchu» nir. <sup>20</sup> ¿Pitaj canchi

\* **9:11-13** Génesis 25.23; Malaquías 1.2–3. \* **9:15** Éxodo 33.19.

\* **9:17** Éxodo 9.16.

Tayta Diosninchita ashipänanchipaj? Mitu manca-yupay caycanchi. Mitu manca quiquin manca-rurajta mana ninmanchu: «¿Imanirtaj cay-nirajta ruramashcanqui?»<sup>21</sup> Manca-rurajga yarpashanta mitupita ruran. Chay mitullapita waquin mancata ruran cuyayllapaj; waquinta mana. Chay-jina Tayta Diosninchipis yarpashanta nuwanchiwan ruran.

**22-24** Chaymi juchallačhu arujcunata ushyacächinan camacan. Ushyacächimänanchi captinsi, juchanchita jurgapämänanchi captinsi, Tayta Diosninchchi llaquipämänanchi camacan. Paypa maquinčhu cawaycanchi. Israel runa captinchisi, jäpa runa captinchisi, unaypita-pacha acracamashcanchi llaquipämashanchita tantiya-cunanchipaj. Llapaninchita acracamashcanchi imaycamanpis janaj pachačhu cawananchipaj.  
**25** Chaymi Oseas isquirbishan libručüpis Tayta Diosninchchi nin:  
 «Jäpa runacunata wajta runa-jina ricaj carsi, acracushaj wamrachacunäpaj.

Wasguishcunata llaquipar, sumaj llaquipäshaj.\*  
**26** «¿Piraj cacullanquipis?» nishä runacunata wamrachacushaj.»

Jananmanpis nin:  
 «Jamcunata mana ricsijpishchu.  
 Mana wamrächu canqui» nish captisi,  
 runacuna jinallančhu auninga:  
 «Cawaj Tayta Diosninchipa wamrancuna carcay-canqui» nir.»\*

**27-28** Israel runacunapaj Isaías niran:

---

\* **9:25** Oseas 2.23.    \* **9:26** Oseas 1.10.

«Israel runacuna agu-jina chay-chicajmi.  
 Chaypis jucha aparicushanpita Tayta Diosninchi  
     llapanta-yupay ushyacächinga.  
 Mana llaquipar, juclla ushyayapa ushyarachinga.  
 Auquillunchicunata aunishanta écharcumi  
     ichanga, waquin-waquillanta jish-  
     pichinga.»\*

**29** Jananmanpis Isaías niran:

«Auquillunchicunata waquin-waquillanta  
     Munayniyuj Tayta Diosninchi mana  
     jishpichiaptin,

Sodoma marcawan Gomorra marca  
     ushyacashan-jina nuwanchipis pasaypa  
     illarishuwan caran.»\*

**30** Canan sumaj tantiyacushun. Jäpa  
 runacunata mana imatapis ruraycaptin, alli  
 ñawinwan Tayta Diosninchi rican Jesúspa  
 shiminta échasquicushallanpita. **31-32** Israel  
 runacunatam ichanga Jesúspa shiminta mana  
 échasquicushanpita wasguiparan. Paycuna Tayta  
 Diosninchi alli ricananta munar, Moiséspa  
 shimin nishannylla tucuya ruraran: «Paypa  
 shiminta llapanta écharcupti, alli ñawinwan Tayta  
 Diosninchi ricamanga» nir. Chaymi Jesústa  
 tunichicuj rumita-jina ricar, shimintapis mana  
 échasquicuranchu.\* **33** Israel runacuna Washäcuja  
 wasguinanpaj shiminchu Tayta Diosninchi  
 musyachicuran:

---

\* **9:27-28** Isaías 10.22-23. \* **9:29** Isaías 1.9. \* **9:31-32** Griego  
 rimaychu tunichij rumipita rimar Jesúspita rimaycan. Israelpuna  
 nuwanchi-raycur Jesús wañuyman éhayashanta mana auniranchu.  
 Chaymi juéhu chapämashanchi-jina yarpayninpis chapash caran.

«Sión marcáchu juc runa yuringa pitapis llutäpacachinanpaj.  
 Tunichicuj rumita-jina runacuna ricanga.  
 Achcajmi wasguipanga.  
 Pingaymanpis ́hayanga  
 Paypa shiminta ́chasquicurmi ichanga, alli cawayta taringa.  
 Imaypis mana pingayman ́hayangapächu» nir.\*

## 10

*Israel runacuna Moisés pa shiminta ́charcuya ta munashan*

<sup>1</sup> Irmänucuna, Israel-masícuna Tayta Diosninchipa maquinchú cawananta llapan shungüwan munä. Jishpichinanta munar, waran-warán Tayta Diosninchita mañacapü. <sup>2</sup> Israel-masícuna tucuya ruran Tayta Diosninchí alli ricananpaj. Sumaj manchapacunpis. Shungun munashanta mana tantiyacurmi ichanga, pantacash purircaycan. <sup>3</sup> Alli ricananpaj Tayta Diosninchí mayna camacächish caycaptinsi, wasguipan. Quiquin yarpashanta rurar, Moisés pa shimillanta ́charcuya ta munan. <sup>4</sup> Chaypis Tayta Diosninchí juchaynajta alli ñawinpa ricamanchi mana Moisés pa shiminta ́charcushallanchipitachu; manchága Washäcu Jesúspa shiminta ́chasquicuptinchi. Chaymi Israel-masícuna Moisés pa shiminta ́charcuya ta yarpar, pantapacun.

---

\* **9:33** Isaías 28.16. Israel runacunapa jatun marca ishcay jutiyuj caran. Waquin runa nin: «Sión marca» waquinna: «Jerusalén marca.»

**5** Unay isquibishanchu quiquin Moisés niran: «Cawayta munar, Tayta Diosninchipa shimintaraj llap-llapanta čharcushuwan.»\* Chaura Tayta Diosninchichi juchaynajta ricamänanchipaj shiminta wiyar, llapallanta sumaj-sumaj čharcunanchi. **6** Jesúspa shiminta čhasquicucunatam ichanga yupachicushallanchipita juchaynajta Tayta Diosninchichi ricamanchi. Chaymi ama nishuwanchu: «Janaj pachapita Washäcuja pushamushun.» Washäcujninchichi Jesús mayna yanapaycämanchi. **7** Chaynuypis ama nishuwanchu: «Yanapämänanchipaj chacaj pachapita cawarachimushun.» Jishpichimänanchipaj mayna Washäcujninchichi Jesús shamusha. Wañushanpitapis mayna cawarimusha. **8** Payllaman yupachicuptinchi, jishpichimanchi. Shiminčhüpis nin:

«Tayta Diosninchipa shimin mayna shunguyquiman čhayasha.

Shimintapis willapäcuycanqui.»\*

Nuwacunapis Washäcuj Jesúsman yupachicunallanchipita willapäcurcaycā. **9** Chaymi llapan shunguyquian yupachicur: «Washäcuj Jesúsga Taytanchim. Maquinčhu purichimanchi. Wañuypitapis Tayta Diosninchichi cawarachimusha» nir willapäcuptiqui, jamcunatapis Tayta Diosninchichi jishpichishunquipaj. **10** Tayta Diosninchichi alli ricamänanchipaj Washäcuj Jesúsman llapan shungunchiwan yupachicushun. Jishpichimänanchipaj Jesústa taytachacushun. Pi-maytapis willapäshun. Ama upällacushunchu.

---

\* **10:5** Levítico 18.5. \* **10:8** Deuteronomio 30.11–14.

**11** Isaías isquirbishanchüpis nin: «Yupachicujcunata pingayman Tayta Diosninchi mana churangachu.»\*

**12** Israel runa captinchisi, jäpa runa captinchisi, Tayta Diosninchi llaquipämanchi. Payman yupachicuptinchi, llapanchita maquinché purichimanchi. Jayacuptinchi, sumaj yanapämanchi. **13** Shiminchüpis nin: «Jayacujcunata pitapis Tayta Diosninchi jishpichinga.»\*

**14** Tayta Diosninchi pii cashantapis mana musyarmi ichanga, ¿imanayparaj runacuna jayacunman? ¿Imanayparaj shiminta wiycunman paypita mana wiycar? ¿Imanayparaj shiminta chasquicunman pipis mana willapaycaptin? **15** ¿Piraj willapäcunman Tayta Diosninchi mana caächaptin? Pipis alli willapata chayachimuptin, cushicuypaj canga. Tayta Diosninchipa shiminpis nin: «Pipis alli willapata chayachimuptin, cushicuypaj.»\*

**16** Ichanga mana llapan runachu shiminta chasquicun. Chaychi unay willacuj Isaíaspis nirán: «Tayta, shimiuita willapapti, pipis mana chasquicushachu.»\* **17** Waquin runa wiycuyta mana munaptinsi, Jesúspita willapäcurcaycä. Willacushäta chasquicujcuna Washäcuj Jesúzman yupachicurcaycan.

**18** Chaynuy caycaptin, ¿Israel-masicuna manachuraj Tayta Diosninchipa shiminta wiasha? Au. Wiyasham. Shiminchüpis nin: «Shimin may-chaychüpis willacucashana.

Shiminta llapan marcachüpis wiashana.»\*

\* **10:11** Isaías 28.16. \* **10:13** Joel 2.32. \* **10:15** Isaías 52.7.

\* **10:16** Isaías 53.1. \* **10:18** Salmo 19.4.

**19** Willapäcuption, ¿willacushan shungunman ́hayashachuraj? Mana. Wiyarsi, mana ́chasquicuranchu. Israel runacunata willacujnин Moiséwan Tayta Diosninchi musyachiran: «Jápa runacunata: «Paycuna runáchi» niptiquisi, wamrachacushaj. Wamrachacupti, chiquinquipaj. Pampaman ́churash runacunata alliman ́churapti, ullgunquipaj» nir.\*

**20** Isaías librúchüpis Israel runacunata piñapar, Tayta Diosninchi niran: «Jápa runacuna pí cashätapis mana tantiyaycarsi, ́chasquicamasha. Mana tapucuycaptinsi, pí cashätapis musyachi-  
cushcä.»\*

**21** Israel runacunapämi ichanga niran: «Mana wiacamaptinsi, chucru shungu captinsi, mana yamacashcächu. Manchäga maquíchu cawananta munashcä.»\*

## 11

*Israel runacunata Tayta Diosninchi mana was-  
guishan*

**1** Chaura mä, tapushayqui. ¿Acracuynin caycaptinchu, llapan Israel runacunata Tayta Diosninchi wasguipasha? Mana. Mana llapallantachu wasguipasha. Nuwapis Israel runa  
cä. Abrahampis, willcan Benjamínpis auquillü.  
**2** Unaypita-pacha acracushan Israelcunata Tayta

---

\* **10:19** Deuteronomio 32.21. \* **10:20** Isaías 65.1. \* **10:21** Isaías 65.2.

Diosninchí mana wasguiparanchu. Shiminchüpis Elíaspita riman. Paymi juc cuti jagayar, niran:  
<sup>3</sup> «Taytallau Tayta, acracushayqui runacuna willacuj-masicunata llapanta wañuy cachisha. Jarashunayqui tullpacunatapis llapanta juéchurachisha. Nuwatapis wañuchimänanpaj ashircaycäman. Quiquilläna jamman yupachicuyca.»\* <sup>4</sup> Tayta Diosninchim ichanga niran: «Mana jamlachu yupachicaycämanqui. Manchäga acracushäcuna janchis waranga (7,000) nuwallaman yupachicaycäman. Paycuna manacaj yaya Baalman mana yupachicunchu. Yaya Baalta mana manchapacunchu.»\* <sup>5</sup> Canan wicanpis Tayta Diosninchí acracushan Israel runacuna caycanraj. Yupashalla caycaptisi, llaquipämashpan camacächin payllaman yupachicärinäpaj. <sup>6</sup> Ichanga mana allita rurashäpitachu wamrachacamasha; manchäga alli shungu cashpan. Llaquipämashanman alli rurashäcuna mana tincunchu.

<sup>7</sup> Chaymi Israel runacuna Tayta Diosninchíwan alli ricanacuya munarsi, mana camäpacushachu. Acracushancunalla Tayta Diosninchiman yupachicun. Waquinta chucru shungu cananpaj camacächisha. <sup>8</sup> Shiminchüpis nin: «Upa cananpaj Tayta Diosninchí camacächisha. Ñawiyuj carsi, rinriyuj carsi, canancamanpis Tayta Diosninchipa shungun munashanta mana tantiyacunchu.»\*

---

\* **11:3** 1 Reyes 19.10, 14. \* **11:4** 1 Reyes 19.18. \* **11:8** Deuteronomio 29.4; Isaías 29.10.

**9** Unay mandaj Davidpis chiqui runacuna imaman ́chayananta munar, Tayta Diosninchita mañacuran:  
 «Tünancuna ñacayman apachun.  
 Imamanpis ́chayachun.  
 Unyanta cutichir, llapallanta illarachiy.  
**10** Ñawin ricaycaptinsi, japa-jina cacuchun.  
 Tantiyayninpis jasacächun.  
 Sumaj ñacananpaj jucpa maquinman ́churay» nir.\*

*Jäpa runacunata Tayta Diosninchchi washashan*

**11** Chaypis ama nishuwanchu: «Jesústa mana ́chasquicushanpita Tayta Diosninchchi Israel runacunata pasaypa wasguipasha. Ricaytapis mana munanchu» nir. Manchäga Israel runacunata wasguipashan-janan jäpa runacunatana Tayta Diosninchchi wamrachacusha. Juchantapis mana yarparanganachu. Jäpa runacunata yanapaptinraj, Israel runacunapis juchanpita wanacunga. Tayta Diosninchiman yupachicunga.  
**12** Israel runacuna wasguipayninpa jäpa runacunata Tayta Diosninchchi sumaj yanapasha. Allipaj wasguipash caycaptin, llapan Israelcunata maquinman Tayta Diosninchchi shuntangapaj. Chay wíchan llapallanchita Tayta Diosninchchi sumaj yanapämäshun.

**13** Jäpa runacuna, canan jamcunatapis tantiyachishayqui. Washäcuj Jesúspita willapänajpaj Tayta Diosninchchi caáchacamasha. Llapan shungüwan willapäcuyçä. **14** Jamcunata willaparsi, Israel-masicunata mana jungächu. Jamcunata ricacushushpayqui Tayta Diosninchiman

---

\* **11:10** Salmo 69.22–23.

yupachicunanta munä. Yupachicuptin, Tayta Diosninchi jishpichinga. <sup>15</sup> Israel runacuna wasguishanpita jäpa runacunatana Tayta Diosninchi alli rican. Ima alliraj canman Israelpunapis Washäcuj Jesústa ñchasquicuptin. Ñchasquicuptin, cawarishta-yupay Tayta Diosninchi ricanga.

<sup>16</sup> Sumaj tantiyacushun: «Juc tantata jaraptingchi, llapan tantata alli ñawinpa Tayta Diosninchi rican. Paypa maquinman yürapa sapinta ñchuraptinchi, callapantin yürapis maquinchu ricalcun.» Chaynuypa tantiyanchi llapan Israelpunata Tayta Diosninchi wamrachacunanta unay auquil-luncuna maquinchu cawashanpita.

<sup>17</sup> Tincuchiypa tantiyacushun. Alli ulibus yüra Israel runacunawan tincun. Jäpa runacunana jačha ulibus yürawan tincun. Alli ulibusta llaumarir, jačha ulibuspa callapanta Tayta Diosninchi tanachisha. Tanachiptin, alli ulibuspa cullullanchüna jačha ulibuspa callapan chillguin. Alli ulibuspa sapillanwan cawan. <sup>18</sup> Chaypis jatun-tucur, Israelpunata pampaman ama ñchurashuwanchu. Callapanga sapinta mana cawachinchu. Manchäga sapinmi callapancunata cawachin. Chayjina jamcunapis Israel runacunapita Tayta Diosninchipa maquinchu cawarcaycanqui. <sup>19</sup> Chaymi alli-tucur ama ninquimanchu: «Alli ulibusta llaumarir, chay culluman tanachimasha jačha ulibus-jina caycaptisi.» <sup>20</sup> Rasullanta rimaycanqui. Ichanga sumaj tantiyacuy. Alli ulibusta llaumariycur wicaparij-jina mana

yupachicushanpita Israel runacunata Tayta Diosninchi jargurisha. Cananga jäpa runa captiquisi, Jesúspa shiminta čhasquicushayquipita maquinčhu puriycächishunqui. Chaymi ama allitucunquichu. Ama witicunquichu. Manchäga Tayta Diosninchita manchapacur cawanquiman.

<sup>21</sup> Alli ulibuspa callapanta mana cuyapaycarga, jamcunatapis mana cuyapäshunquipächu maquin-pita witicuptiqui. <sup>22</sup> Sumaj tantiyacushun. Tayta Diosninchi waquin runata llaquipan; waquinta mana. Wasguipäcuj Israelcunata mana llaquipashachu. Payman yupachicuptiquim ichanga, llaquipashcashunqui. Mana yupachicuptiquim ichanga, callapata llaumarij-jina wicaparishunquipaj. <sup>23</sup> Jesúspa shiminta čhasquicuptin, Israelcunatapis yapay maquinčhu Tayta Diosninchi purichinga. Llaumash carsi, quiquinpa callapanta tanachishan-jina cutichinga. Tayta Diosninchi munayniyuj llaumariycur, cashganman cutichinanpäpis.

<sup>24</sup> Pipis jačha ulibuspa callapanta alli ulibus yüraman mana tanachiycaptinsi, Tayta Diosninchi jäpa runacunata wamrachacusha. Pipis alli ulibuspa callapanta juclla tanarächinman. Chay-jina Tayta Diosninchi acracushan Israel runacunata shuntangapaj.

*Israel runacunata Tayta Diosninchi washänan*

<sup>25</sup> Irmänucuna, mana yačhaj-tucunanchipaj Tayta Diosninchi yarpashanta sumaj tantiyacushun. Wamrachacushanta jäpa runa captinsi, llapanta Tayta Diosninchi ricsiraycan. Israelcunam ichanga chucru shungu cashpan

wasguipaycangaraj llapan ricsirashan jäpa runacunata maquinman shuntanancaman.

**26** Chaypitarañ llapan Israel runacunatapis maquinman Tayta Diosninchi shuntanga. Shiminchüpis nin:

«Washämänanchipaj jucmi Sión marcapita ricarimunga.

Juchaáhu cawashanpita Jacobpa willcancunata wanacachinga.»

**27** Jananmanpis nin:

«Parlanacushäta charcur, jucha aparicushanta mana yarparäshänachu.

Llapanta jungaycushaj.»\*

**28** Chaypis Jesúspa alli willapanta wasguipashanpita Israel runacunata juyu ñawinwan Tayta Diosninchi rican. Jamcunatam ichanga jäpa runa captiquisi, Jesúspa alli willapanta chasquicushayquipita alli ñawinwan ricashunqui. Chaypis unay auquilluncunata acracuyninpa Israelcunata llaquipaycanraj.

**29** Acracushancunata Tayta Diosninchi mana wasguingapächu. Manchäga aunishanta

charcupis, yanapangapaj. **30** Ñaupata jamcuna mana wiyacurayquichu. Chaypis Israelcuna wasguipaptin Tayta Diosninchi llaquipar, jamcunatana maquinchu puriyächishunqui.

**31** Llaquipäshushayqui-jina Israelcunatapis llaquipanga cananlla mana wiyacuptinsi.

**32** Llapanchita llaquipämänanchi-raycur Tayta Diosninchi camacächisha upa-tucunanchipaj. Chaymi Israel runacuna captinchisi, jäpa

---

\* **11:27** Isaías 59.20–21.

runacuna captinchisi, shiminta mana  
wiyacuranchichu.

<sup>33</sup> Chaynuy caycaptin, Tayta Diosninchi yarpashanta, ¿piraj tantiyanman? Yarpay-sapa cayninman, ¿piraj tincunman? Yarpashanta pipis mana tantiyanmanchu. Yarpay-sapa caynintapis mana ricsinmanchu. <sup>34</sup> Shiminchüpis nin: «Tayta Diosninchi yarpashanta pipis mana tantiyanchu.

Pipis mana willapanmanchu.

<sup>35</sup> Pipis mana challishachu:  
<Cutichimay> ninanpaj.»\*

<sup>36</sup> Tayta Diosninchi quiquinmi llap-llapanta camasha. Maquinchú llapantapis purichin. Payllapaj llapanpis caycan. Chaymi payllata llapanchi imay-imaycamanpis alliman churashun. Chaynuy caycullächun.

## 12

*Tayta Diosninchipa shungun munashannuy cawananpaj willapashan*

<sup>1</sup> Irmänucuna, llaquipämashpanchi tucuy-jinanpa Tayta Diosninchi yanapaycämanchi. Cananga nuwanchipita. Unay auquillunchicuna uywata pishtariycur jarashan Tayta Diosninchipa shungunman tincusha. Chay-jina nuwanchipis quiquinchipa caway-bidanchita jarashuwan shungunman tincunanpaj. Payllata manchapacur, maquillanchú cawashuwan. Wañushanchicaman shungun munashallanta rurashuwan. Chaynuy cawananchi sumaj camacan. <sup>2</sup> Chaymi runacuna

---

\* <sup>11:35</sup> Isaías 40.13; Job 41.11.

yarpashannuylla ama cawashunchu. Shungun munashantapis ama rurashunchu. Manchäga shungunman tincunanchipaj Tayta Diosninchi shungunchita ticrachinman. Ticrachiptin, shungunman tincushallanta rurashun. Shungun munashannuylla cawashun. Allillata rurashun.

<sup>3</sup> Tayta Diosninchi llaquipämashpan caćhacamasha llapaniquita piñapänajpaj. Mayganiquipis ama alli-tucunquichu. Manchäga sumaj tantiyacunquiman. Ima-imata ruranayquipäpis Tayta Diosninchi yaćhayta camapushushayquiman-tupu imatapis ruranquiman.

<sup>4</sup> Mä, tantiyacushun. Runapa muguncuna achca caycan. Ichanga juc-niraj-juc-nirajta ruran.

<sup>5</sup> Nuwanchipis Washäcuj Jesúspa maquinčhu cawar juc-niraj-juc-nirajta yaćharpis, juc shungulla cawaycanchi. Mugucuna yanapänacushan-jina nuwanchipis yanapänacushuwan. <sup>6</sup> Shungun munaptin, Tayta Diosninchi yanapaycämanchi ima-imata yaćhananchipäpis. Chaymi shiminta willapäcuya yaćhar, tantiyachimashanchita llapan shungunchiwan willapäcushuwan.

<sup>7</sup> Yanapäcuya yaćhar, sumaj yanapäcushuwan. Tantiyachicuya yaćhar, tantiyachicushuwan.

<sup>8</sup> Shacyächiya yaćhar, irmänunchicunata shacyächishuwan. Tarichicuya yaćhar, puchuy-puchuy tarichishuwan. Irmänunchicunata ricayta yaćhar, llapan shungunchiwan ricashuwan. Pishipacujcunata yanapayta yaćhar, cushicushilla yanapäshuwan.

*Llaquipänacuypita willapashan*

- 9 Irmänucuna, ama janan shungulla  
llaquipänacärishunchu.  
Manchäga llapan shungunchiwan llaquipänacur,  
allillata rurashuwan.  
Manacaj rurashanchicuna llapanpis  
asyächicuypaj.
- 10 Llapaninchi wasi-pura-jina alli ri-  
canacärishuwan.  
Pampaman ama čhuranacushunchu.  
Manchäga alliman čhuranacärishuwan.
- 11 Tayta Diosninchimana munashanta rurananchipaj  
ama jillanäshunchu.  
Manchäga shungun munashallanta llapan shun-  
guchiwan rurashuwan.
- 12 Tayta Diosninchiman yupachicushuwan.  
Cushi-cushilla cawashuwan.  
Ñacayman čhayarsi, ama jagayäshunchu.  
Tayta Diosninchita mañacuycar cawashuwan.
- 13 Irmänucuna pishipacuptin, tarichishuwan.  
Pachacuya ashiptin, pachächishuwan.
- 14 Pipis ashipämaptinchi, chapata ama  
rurashunchu. Manchäga Tayta Diosninchita  
mañacapushuwan sumaj yanapänanpaj.
- 15 Pipis llaquicur wagaptin, wagäshishuwan.  
Alliman čhayar cushicuptin, cushicäshishuwan.
- 16 Jucninchichi-jucninchipi juc shungulla  
cawashuwan. Ama alli-tucushunchu. Ama  
yačhaj-tucushunchu. Manchäga llapanwan alli  
ricanacärishuwan.
- 17 Pipis nanächimaptinchi, unyanta ama  
cutichishunchu. Manchäga llapanpa ricay  
ñawinčhu allillata rurar cawashuwan. 18 Llapan  
runawan allilla cawananchipaj imanuypapis

camacächishuwan. 19 Wawacuna, pipis  
chiquir imatapis rurashuptiqui, unyanta ama  
cutichinquiuchu. Manchäga Tayta Diosninchipa  
maquinman ñuray. Paywan ñuracächun. Paypa  
shiminchu nin:

«Imatapis rurashuptiqui, maquiman ñuray.  
Ama yatapaychu.

Ñacachinä camacan.»

20 Jananmanpis nin:  
«Chiquipäshushayqui yargaptin, micuyta tarichiyy.  
Yacunaptin, yacuta macyay.  
Chayrämi pingayman ñhayanga.  
Pingacurraj, wanacunga.»\*

21 Pipis imatasi rurashuptiqui, unyanta ama  
cutichinquiuchu. Manchäga mana yamacällar  
alli ñawiquiwan ricaptiqui, juyu cayninpis  
ushyacanga.

## 13

### *Auturdäcunata wiycunanchipaj cashan*

1 Irmänucuna, auturdäcunata wiycushun.  
Auturdäcuna ñuracänanpaj quiquin Tayta  
Diosninchia camacächin. Mana camacächiptin,  
pipis auturdä cayman mana ñhayamanchu.  
2 Chaymi auturdäcunata ticrapur, quiquin Tayta  
Diosninchita ticrapunchi. Ticrapushanchipita  
ñacayman ñhayashunpaj.

3 Auturdäcunata ama manchacushunchu.  
Allita ruraptinchi, mana ñacachimäshunchu.  
Mana wiycujcunatam ichanga ñacayman  
ñhayachinga. Chaymi mana mancharish

---

\* **12:20** Proverbios 25.21–22.

juyänanchipaj auturdäcunata manchapacur cawashun. Chayraj alli ricamäshun. <sup>4</sup> Paycuna Tayta Diosninchipa maquinčhu caycan alli ricamänanchipaj. Chaypaj cargunman čhayasha. Paypa maquinčhu cashpanchi mana allita ruraptinchi, llutanta rurashanchiman-tupu ñacachimäshun. Auturdäcunata pucllacuya mana jushunpächu. Paycuna Tayta Diosninchipa shungun munashallanta rurar, llutan rurajcunata ñacayman čhayachinga. <sup>5</sup> Chaymi Tayta Diosninchita manchapacur, auturdäcunatapis wiycushun. Ñacaypita jishpiyllata ama yarpäshunchu.

<sup>6</sup> Tayta Diosninchichi camacächish caycaptin, auturdäcuna mañashan jillayta čhurashun. Paycuna Tayta Diosninchipa mandu-rurajnin. <sup>7</sup> Chaymi manchapacur alli ricashun. Imatapis mañaptin, čhurashun. Aruchimaptinchi, arushun.

<sup>8</sup> Jaga-tucush-imarga, juclla cutichir ushy-acächishun. Runa-masinchita llaquipänanchim ichanga ama imaysi ushyacanmanchu. Llaquipashpanchi alli ricarga, Tayta Diosninchipa shimintapis llapantana čharcushcanchi. <sup>9</sup> Paypa shiminta musyanchi. Moiséswan musyachicuran: «Majayquita ama jananpachiychu. Ama wañuchicuychu. Ama suwacuychu. Jucpa imancunatapis ama munapaychu» nir. Moisés isquirbischancuna llapan jucnayllaman jucllachacan: «Quiiqui alli ricacushayqui-jina runa-masiquitapis alli ricanquiman» nishallanman.\* <sup>10</sup> Llaquipäcujcuna

---

\* **13:9** Éxodo 20.13–17; Deuteronomio 5.17–21; Levítico 19.18.

runa-masinta alli rican. Pitapis mana juyu ñawinwanchu rican. Chayraj Tayta Diosninchipa shiminta llapanta ñarcun.

*Tayta Diosninchipa shiminta wiyacunanpaj cashan*

<sup>11</sup> Irmänucuna, cay pachačhu yupash junajlla cawanchi. Chaymi piñapashajta wiyacunquiman. Ama upa-tucunquimanchu. Manchäga Tayta Diosninchipa shimin nishannylla cawashun. Unayga Jesúspa shiminta ñasquicur: «Juclla shuntacamäshun» nir mana yarpashcanchichu. Cananmi ichanga jishpichimänanchipaj wallcana pishin. <sup>12</sup> Chacaj cashantapis, junaj cashantapis musyanchi. Cay pachačhu cawayga chacajčhu caway-jina. Runacunapis juchallačhu arun. Tayta Diosninchichi jishpichimänanchi junaj ñayamuptinmi ichanga, achicyaj junajčhüna cawashunpaj. Chaymi juchata ama aparicushunchu. Manchäga Tayta Diosninchipa shungun munashannylla cawashuwan. <sup>13</sup> Achicyaycaj cawayčhu-jina manchapacur cawashuwan. Upyallačhu, tünallačhu ama purishunchu. Allgu-jina warmin-warmin, runan-runan ama purishunchu. Marca-pingay ama cawashunchu. Ama jayapänacushunchu. Ama chiquinacushunchu. <sup>14</sup> Shungunchi munashallanta imatapis ama rurashunchu. Manchäga Tayta Jesucristupa maquillančhu cawashuwan. Llapan ricay shungun munashallanta rurashuwan.

*Juc-niraj yarpaj irmänucunata tantiyacu-nanchipaj*

<sup>1</sup> Tayta Diosninchiman yupachicur, sumaj tantiyanacushun. Irmänunchicunapa yarpayninwan yarpayniqui mana tincuptinsi, ama pampaman churanacunquichu. Yarpayniquijanan ama chiquinacunquichu. Chiquinacur, yatayayman pipis chayan. <sup>2</sup> Waquin irmänunchi tarishanta micun. Waquinna Tayta Diosninch alli ricananta yarpar, ricsish-ricsishllata micun. <sup>3</sup> Ricsish-ricsishllata micuptiqui Tayta Diosninch alli ricashushayquita yarparpis, tarishanta micujcunata pampaman ama churanquichu. Tarishayquita micuptiqui Tayta Diosninch alli ricashushayquita yarparpis, ricsish-ricsishllata micujcunata pampaman ama churanquichu. Llapantapis Tayta Diosninch wamrachacusha.

<sup>4</sup> Llapanchi Tayta Diosninchipa maquinchu cawaycanchi. Sumaj tantiyacushun. ¿Juc runapa uywayninta tincupänanchi camacanchuraj? Mana. Quiquin wasiyuj musyan uywaynin alli arushantapis, mana alli arushantapis. Chajjina Tayta Diosninchispis allita rurananchipaj yanapaycämanchi. Munashanta ruraptinchi, pingayman chayananchitapis mana camacächingachu.

<sup>5</sup> Waquin irmänunchi ricsish junajllačhu jutucar, Tayta Diosninchita alliman churan. Waquinna waran-waran jutucan alliman churananpaj. Imanuy yarparpis, llapan shungunchiwan Tayta Diosninchita alliman churashun. Quiquinchi-pura ama tincupänacushunchu. <sup>6</sup> Waquin irmänunchi ricsish junajta acran Tayta Diosninchita alliman churananpaj. Waquinna tarishan micuya micun.

Llapantapis ruran Tayta Diosninchita alliman ́Churashpan: «Ima allish micunäpaj tarichimanqui» nir. Waquinninchi ricsish micuyllata micurpis, Tayta Diosninchita alliman ́Churashpanchi micunchi: «Ima allish micunäpaj tarichimanqui» nir. Ima-imata micurpis, rurarpis, mana llutantachu ruraycanchi.

<sup>7</sup> Mayganinchipis mana quiquillanchipächu cawanchi. Mana ushyaräcunallanchipächu wañunchi. <sup>8</sup> Cawarpis, wañucurpis, Tayta Jesústa alliman ́churanchi. Cawarpis, wañucurpis, Washäcuj Jesúspa maquinéhu cawaycanchi. <sup>9</sup> Nuwanchi-raycur Washäcuj Jesús wañuyman ́chayasha. Ichanga cawarimusha cawajcunatapis, wañushcunatapis maquinéhu charänanpaj.

<sup>10</sup> Chaymi llapanchita maquinéhu Tayta Jesús puriycächimaptinchi, ¿imanirtaj irmänucunata waquinta jamurpanqui? ¿Imanirtaj pampaman ́churanqui? Llapanchita ima-imata rurashanchitapis Tayta Diosninchchi jurgämäshunpaj. <sup>11</sup> Shiminchüpis isquirbiraycan:

«Cawaycaj Tayta Dios caycä.  
Shimi ́charcucanga.

Munayniuj cashäta tantiyacur llapan runa manchapacamar, ñaupäman jungurpacunga.

Shiminwanpis alliman ́churamanga» nir.\*

<sup>12</sup> Sumaj tantiyacushun. Tayta Diosninchchi alli ñawinwan ricamänanchipäpis, juyu ñawinwan ricamänanchipäpis quiquinchi ima-imatapis rurashanchipita canga. Paymi llapan runata imata rurashantapis jurgapanga.

---

\* **14:11** Isaías 45.23.

**13** Chaymi ama tincupänacushunchu. Tincupänacuptinchi, irmänunchicuna micushanchijanan, upushanchi-janan juchata aparicurunman. Juchata aparicur, Washäcuj Jesústapis wasguirunman. **14** Tayta Jesúzman yupachicuptinchi, ima micuypis juchaman mana jančhamanchichu. «Waqin micuycuna mana allichu» nijcuna quiquillanpita yarpan. Chaymi: «Mana allichu» niptin, ama micuchishuwanchu. Ama tincupäshuwanpishchu. **15** «Mana allichu» nij irmänucunapa ricay ñawinčhu micur, tincupaj-yupay caycanchi. Mana llaquipäcuj-yupay pampaman čhuraycanchi. Micushanchi-janan pipis Washäcuj Jesústa ama wasguipanmanchu. Payga llapanchita washämänanchi-raycur wañuyman čhayasha. **16** Chaymi shungunchi munashanta micur, Tayta Diosninchita pingayman ama čhurashunchu. **17** Paypa maquinčhu cawanchi mana ricsish-ricsishllata micushanchipitachu, mana tarishanchita micushanchipitachu. Manchäga shungunchi shungunman tincunman. Paypa shungun munashanta rurashun. Llapanwan alli ricanacur, allilla juyäshun. Cushishalla cawashun. Llapanpäpis Espíritu Santu yanapaycämanchi. **18** Washäcuj Jesústa manchapacur alli cawaptinchi, Tayta Diosninchchi sumaj cushicun. Runa-masinchipis alli ricamäshun. **19** Chaymi irmänunchicunawan imaypis alli ricanacushun. Tayta Diosninchiman sumaj yupachicunanchipaj shacyächinacushun.

**20** Micuy-janan Tayta Diosninchipa maquinčhu

cawajcunata ama mashtacächishunchu. Ima micuypis allitaga allim. Ichanga micushanchijanan irmänunchicunata mashtacächir, marcapingayman chayanchi. <sup>21</sup> Chaymi irmänunchi: «Cayga jucha» nir yarpaptin, ricay ñawinchu ima aychatapis ama micushuwanchu. Bünutapis ama upushuwanchu. Achäqui cananpaj imatapis ama rurashuwanchu.

<sup>22</sup> «Mana imananchu» nir quiquillayqui yarparanquiman. Tayta Diosninchi llapanchipa shungunchita musyapämanchi. «Imata micuptinchisi, Tayta Diosninchi mana juyu ñawinwan ricamäshunchu» nir yarpar, shungunchi munashanta micur, upur cawashun. <sup>23</sup> «¿Allichuraj, manachuraj?» nir micurmi ichanga, juchata aparicunchi. Tayta Diosninchipa shungunman tincushanta mana sumaj musyaycar ruraptinchi, imapis jucha.

## 15

### *Washäcuj Jesúspa llupinpa jatinanchipaj cashan*

<sup>1</sup> Llapan shungunchiwan Tayta Diosninchiman yupachicur, wichayapa-uraypa yarpaj irmänunchicunata llaquipäshawan. Quiquillanchipaj ama yarpäshunchu. <sup>2</sup> Tayta Diosninchiman sumaj yupachicunapanaj irmänunchicunapa ricay ñawinchu alli purishun. <sup>3</sup> Washäcuj Jesúspis mana quiquillanpächu yarpasha. Manchäga runacuna ashlliptinsi, Tayta Diosninchipa shungun munashanta rurasha. Chaypaj Tayta Diosninchipa shiminéhu nin: «Taytallau Tayta, runacuna ashllishuptiquipis,

́chasquicushcä.»\*      <sup>4</sup> Ima captinpis, paypa shimin tantiyachimanchi shacya-shacyalla cawananchipaj, mana yamacällar sumaj yupachicunanchipaj. Shimin shungunchiman ́chayaptin, payman sumaj yupachicunchi.

<sup>5</sup> Llaquipäcuj Tayta Diosninchi yanapayculläshunqui, ari. Ima captinsi, paymi shacyächishunqui Washäcuj Jesúspa maquinchéhu cawar juc shungulla cawanayquipaj. Tayta Diosninchi imaypis mana caćharishunquipächu. <sup>6</sup> Chayraj juc shungulla, juc shimilla Tayta Diosninchita alliman ́churancipaj. Payga Taytanchi Jesucristupa Taytan.

<sup>7</sup> Chaura Washäcuj Jesús alli ricamashanchijina jucninchu-jucninchipis alli ricanacushun. Chaynuy cawashpanchi Tayta Diosninchitapis alliman ́churaycanchi. <sup>8</sup> Sumaj tantiyacushun. Washäcuj Jesús yanapäcuj cananpaj cay pachaman shamuran. Israel-masincunata washänan-raycur Tayta Diosninchi caćhamuran unay Israel auquillunchicunata aunishanta ́Charcucächinanpaj. <sup>9</sup> Jäpa runacunatapis washänan-raycur caćhamuran. Jesús llaquipaptin, jäpa runacunapis Tayta Diosninchita alliman ́churaycan. Paycunapaj Tayta Diosninchipa shiminpis nin:

«Taytallau Tayta,  
jäpa runacunawan juturparpis, alliman  
́churashayqui.

Cantar allíchu jurgushayqui.»\*

<sup>10</sup> Chaynuypis nin:

---

\* **15:3** Salmo 69.9.    \* **15:9** 2 Samuel 22.50; Salmo 18.49.

«Tayta Diosninchí acracushan runacuna  
cushicuptin,  
llapan runa may-chaychú juyarpis,  
cushicuchun.»\*

<sup>11</sup> Jananmanpis niran:

«Llapan jäpa runa Tayta Diosninchita alliman  
churaycullächun.

Llapan runa manchapacur, allíchu jurgullächun.»\*

<sup>12</sup> Willacuj Isaáspis niran:

«Jesépa willcancunapita juc munayniyuj yuringa.

Llapan jäpa runacunata maquinchú purichinga.

Payman jäpa runacunapis yupachicunga.»\*

<sup>13</sup> Irmänucuna, Tayta Diosninchí yanapayculläshunqui payman yupachicunayquipaj, sumaj allilla juyänayquipaj, cushishalla cawanayquipaj. Payga shiminta charcun. Mana yamacällar yupachicunayquipaj Espíritu Santupis yanapayculläshunqui.

### *Jesúspita willapäcur Pablo purishan*

<sup>14</sup> Irmänucuna, quiquipi-pura allíricanacushayquita, yarpay-sapa cashayquita, tantiyanacur cawashayquita musyä. <sup>15</sup> Chaypis shacyäcamur cartacamü mana tantiyashayquicunapita willapärinäpaj. Llaquipämar, Tayta Diosninchí mincacamasha anyapäcur purinäpaj.

<sup>16</sup> Jäpa runacuna-raycur Washäcuj Jesúspa allí willapanta willapäcunäpaj caáchacamasha. Paycunapaj cüra-jina mañacapuycä. Tayta Diosninchipa shiminta willapäcuycä. Shiminta chasquicuptin, Tayta Diosninchipa shungunwan

---

\* <sup>15:10</sup> Deuteronomio 32.43. \* <sup>15:11</sup> Salmo 117.1. \* <sup>15:12</sup> Isaías 11.10.

tincun. Allinnin uywata jarashanta ricashan-jina alli ñawinpa rican. Espíritu Santuwanpis yanapan shungun munashannuy cawanapaj.

<sup>17</sup> Nuwapis Washäcuj Jesúspa maquinčhu cawar, Tayta Diosninchipa shungun munashanta rurär, cushicunä camacan. <sup>18</sup> Washäcuj Jesúspita willapäcupti, jäpa runacunapis Tayta Diosninchiman yupachicun. Chaypita cushicü. Mana shimilläwanchu willapashcä. <sup>19</sup> Manchäga Tayta Diosninchichi camacächiyinpa runacunata sumaj yanapashcä. Runa mana imaysi ricashancunata ruranäpaj Espíritu Santu camacächisha. Tayta Diosninchichi munayniuj cashanta tucuy-jinanpa tantiyachishcä. Jerusalén marcapita Ilírico marca quinrancaman Washäcuj Jesúspa alli willapan-tapis willapäcushcä.

<sup>20</sup> Willapäcuj aywar, juc willacushan janaman mana yaycushcächu. Manchäga pipis mana ćhayashan marcacunallaman yaycushcä. Mä, tantiyacushun. Wasi ruraj runa quiquin pирgashanman tapyan; mana juc pирgashanmanchu. Chayjina pipis mana willapäcushancunaman Washäcuj Jesúspita willapäcushcä. <sup>21</sup> Tayta Diosninchipa shiminčüpis nin:

«Paypita unay mana willacucash caycaptinsi, shimin shungunman ćhayanga.  
Pí cashantapis mana tantiyachish caycaptinsi, sumaj tantiyacunga.»

*Jerusalén marcaman cuyachicuycunata Pablo apashan*

<sup>22-23</sup> Chaymi wacpa-caypa purir unaypita-pacha watucuj shamuya munarpis, mana

camäpacushcächu. Cananga cay quinranpa willapäcuya ñcharcushcä. Waquin marcacunaman ñchayanäpis mana cannachu. <sup>24</sup> Watucuya munar España marcapa aywar, yagaramushaj. Ricanacuptinchi, imallawanpis yanapämánqui willapäcur purinäpaj.

<sup>25</sup> Ichanga imallatapis apacurcur, Jerusalén marcaparaj aywarishaj irmänunchicuna chaywan cawananpaj. <sup>26</sup> Acaya quinranchhu, Macedonia quinranchhu irmänunchicuna shungun shacyaptin, cuyachicuyninta shuntasha Jerusalén marcachu pishipacuj irmänucunata yanapänanpaj. <sup>27</sup> Shungun shacyaptin, shuntar allita rurasha. Jäpa irmänunchicuna Israel runacunapita Washäcu Jesústa tarisha. Jagatucush-yupay ricacusha. Chaymi Jerusalén marcachu pishipacuj Israel irmänunchicunata yanapäshun pañchanäpis, jananpäpis. <sup>28</sup> Jerusalén marcaman cuyachicuynincunata ñhayarcachir, España marcapa llucshishaj. Aywar, yaycaramushaj. <sup>29</sup> Ñhayamupti, Washäcu Jesús sumaj-sumaj yanapämäshun cushishalla shacyächinacunanchipaj.

<sup>30</sup> Irmänucuna, maquinchhu Taytanchi Jesucristu llapanchita charämanchi. Espíritu Santupis llaquipänacunanchipaj yanapaycämanchi. Chaymi ama jungamanquichu. Llapan shunguyquiwan Tayta Diosninchita mañacapamanqui, ari. <sup>31</sup> Mañacunqui Judea quinranchhu Jesúspa shiminta wasguipaj Israelpuna mana imatapis ruramänanpaj, cuyachicuycunata apashätapis Jerusalén marcachu irmänucuna cushi-cushilla

́chasquinanpaj. <sup>32</sup> Chaynuypis mañacunqui Tayta Diosninchi camacächiptin, watucuj ́hayamunäpaj. Tincushpanchi cushirishämi. <sup>33</sup> Tayta Diosninchi llapaninchita yanapaycämäshun allilla cawananchipaj. Chaynuy caycullächun.

## 16

### *Irmänucunata Pablo wamayashan*

<sup>1</sup> Cananga cartäwan mama Febe ́hayamuptin, ́chasquinqui, ari. Cencreas marcáchu irmänanchi Febe jutucaj irmänunchicunata rican. <sup>2</sup> Payga Tayta Jesúspa maquinčhu cawaycan. Chaymi jamcunapis Tayta Diosninchipa wawan cashpayqui alli ñawiquiwan ricanayqui camacan. Pishipacushan-tapis tarichinayqui camacan. Mama Febe achca-jta yanapasha. Nuwatapis sumaj yanapämasha.

<sup>3</sup> Mama Priscilatapis majan Aquilatapis wamayapämay. Paycuna Washäcuj Jesúspita willapäcptü, puríshimasha. <sup>4</sup> Wañuy-caway imapitapis washämasha. Chaymi jäpa runacunapa marcancunáchu jutucaj irmänucunapis sumaj cusicärin. Nuwalläpis sumaj cusicü. <sup>5</sup> Mama Priscapa wasinčhu jutucaj irmänunchicunatapis wamayapämay. Yačhänacushä Epénetuta wamayapämay. Paymi Asia quinrančhu Washäcuj Jesúspa shiminta puntata ́chasquicusha. <sup>6</sup> Mama Mariatapis wamayapämay. Payga tucuy-jinanpa yanapashcashunqui. <sup>7</sup> Marca-mäsi Andrónicutapis, mama Juníastapis wamayapämay. Paycunawan iwal carsilčhu wičgarashcä. Jesúspa cačhan cashanta llapan runa musyan. Paycuna puntata Washäcuj Jesúspa shiminta ́chasquicush

caran; chaypitarañ nuwa. <sup>8</sup> Ampliatutapis wamayapämäy. Tayta Jesús-janan paywan sumaj yačhänacü. <sup>9</sup> Washäcuj Jesúspita willacäshimaj Urbanutapis, yačhänacushä Estaquistapis wamayapämäy. <sup>10</sup> Apelestapis wamayapämäy. Washäcuj Jesúsman yupachicushan-janan sumaj ñacasha. Aristóbulucunatapis wamayapämäy. <sup>11</sup> Marca-masi Herodióntapis, Narciso castacunatapis wamayapämäy. Paycunapis Tayta Jesúsman yupachicun. <sup>12</sup> Chay ñaňalla Trifenañatapis, Trifosatapis wamayapämäy. Paycuna Jesús-raycur sumaj yanapäcuycan. Mama Pérsiditapis wamayapämäy. Paypis Tayta Jesús-raycur sumaj yanapaycaran. <sup>13</sup> Irmänu Rufutapis wamayapämäy. Payga Tayta Jesúspa acracuynin. Mamantapis wamayapämäy. Mamanga wamranta-yupay ricamasha. <sup>14</sup> Asíncritutapis, Flegóntapis, Hermestapis, Patrobastapis, Hermastapis, paycunawan juturaj irmänucunatapis wamayapämäy. <sup>15</sup> Filólogutapis, mama Juliatapis, Nereutapis, Nereupa panintapis, Olimpastapis, paycunawan juturaj irmänucunatapis wamayapämäy. <sup>16</sup> Juturashpayqui jucniqui-jucniquipis llapan shunguyquiwan wamayänacärinqui. Washäcuj Jesúsman yupachicushpan jutucaj irmänunchicina chaytucuypita wamayäshunqui.

### *Irmänucunata Pablo piñapashan*

<sup>17</sup> Irmänucuna, Jesúspita willapäshushayquita ama jungaychu. Pipis quiquinpa yarpashanman jančhayta munashuptiqui, witichiyya munashuptiqui, ama čhasquipanquichu.

Paycuna llutanta willapäcuycan. <sup>18</sup> Quiquin munashallanta ashircaycan; mana Taytanchi Jesucristu munashantachu. Paycuna pačhallanta ashin. Alli-tupayllapa, cushichipayllapa lluta runacunata pantachin. <sup>19</sup> Jamcuna Tayta Diosninchita wiyyacuj cashayquitapis, alli rurashayquitapis chay-tucuyčhu musyaptin, jatunpa cusicü. Chaypis Tayta Diosninchita manchapacur cawanquiman. Juchata ama aparicunquimanchu. <sup>20</sup> Tayta Diosninchchi allilla cawayacächimanchi. Supaytapis ičhipur, ushyayapa ushyaringa. Pampaman čuraptin, maquiquičhüna canga.

Taytanchi Jesucristu alli shungu cashpan yanapayculläshunqui, ari.

<sup>21</sup> Irmänucuna, willacäshimaj Timoteo wamayäshunqui. Marca-masë Luciupis, Jasónpis, Sosípatrups wamayäshunqui.

<sup>22</sup> Nuwa Tercio, Pablupa isquirbänun caycä. Tayta Jesúzman yupachicur, llapaniquita wamaya. <sup>23-24</sup> Irmänu Gayupis wamayäshunqui. Paypa wasinčhu pacharpaycä. Wasinčhüpis irmänunchicuna jutucan. Erastupis, Cuartupis wamayäshunqui. Irmänu Erastuga cay marcapa jillay charajnín.

### *Tayta Diosninchita alliman čurashan*

<sup>25</sup> Tayta Diosninchita llapallanchi alliman čurayculläshun. Washäcu Jesúspita willapapti, yanapäshunqui alli willapanta sumaj tantiyacunayquipaj. Unaypita-pacha Jesúswan jishpichimänanchipaj shungullančhu yarpararan. <sup>26</sup> Ichanga cananraj willacuyca. Imaycamanpis

cawaj Tayta Diosninchi camacächiptin,  
unay willacujnincuna jishpichicujpita  
isquirbirächishančhu musyachicuran. May-  
chaychüpis llapan runa Washäcuj Jesúsman  
yupachicunanpaj, payllata wiyacunanpaj  
Tayta Diosninchi camacächiran. <sup>27</sup> Washäcuj  
Jesús yanapaycämaptinchi, imaycamanpis Tayta  
Diosninchita alliman čhurayculläshun. Payllam  
Tayta Diosninchi. Sumaj yarpay-sapa. Chaynuy  
caycullächun.

**Mushug Testamento  
New Testament in Quechua, Panao Huánuco  
(PE:qxb:Quechua, Panao Huánuco)**

copyright © 2009 Wycliffe Bible Translators, Inc.

Language: Quechua, Panao Huánuco

Translation by: Wycliffe Bible Translators, Inc.

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Quechua, Panao Huánuco

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

7054d98c-7632-5339-9ee8-560fc45d86cd